


# Wantok

Mosbi prais 25t  
Arapela provins 30t




## Insait



● Micah Wes — wangepela dokta boi husat i Helt Minista nau — pes 11.

- Ol yut i ting wanem long yia bilong ol 1985? Lukim stori long pes 12 na 13.
- Sista Claire — mama bilong 21 pikinini — pes 10.
- Tena Yut grup i soim pasin bilong helpim ol yet — pes 6.
- Ol pas — pes 16 na 17.
- Lotu — pes 19.
- Stori tumbuna — pes 20.

## Taim bilong kopi



Kopi em i wangepela bisnis i save pulim bikpela mani i kam insait long PNG na long ol liklik ples nabaut long kantri. Pe bilong kopi long PNG i surik i go antap na Kopi Bot i singaut long ol pipel i groim moa kopi. Lukim stori long pes 5.

Poto i kam long PNG Kopi Industri Bot.



● Max Moeder, Primia bilong Madang Provins.

## I no gat ples bilong pipia

**OL pipel insait long taun bilong Madang bai gat bikpela wari long helt sapos nesanel gavman, provinsal Madang na Willing & Partners Kampani husat i ranim wok bilong James Barnes long kirapim mit faktori i no tingtingur long sindaun bilong ol pipel.**

Primia bilong Madang Provins, Mista Max Moeder i tok em bai toktok long dispela samting wantaim Prais Minista Pias Wingti "long taim em i kam long opim nupela Christensen Research Institute" long Fonde Janueri 9.

Mista Moeder i tok, Nesanel Gavman i tingting nau long toktok gen wantaim James Barnes Kampani bilong Australia long stretim sampela hap bilong toktok ol i sainim long kirapim mit faktori long taun bilong Madang.

Ol pipel bilong taun i gat tupela bikpela

wari long helt bilong ol na famili bilong ol, sapos dispela faktori i stat long mekim tinmit.

Dispela helt birua bai kamap long ol taun pipel bikos i no gat gutpela rot nau bilong mit faktori i tromoi ol rabis pipia bilong mit long en.

Willing & Partners i painimaut olsem ol i gat wari nau long han bilong ol long go het na kirapim dispela faktori. Olsem na ol i salim pinis tok save long dispela wari i go long hetopis bilong James Barnes Kampani long Australia. Menasa bilong Willing & Partners, Albert Rutten i tok long Madang long Mande Janueri 6.

Mista Rutten i tokim *Wantok Niuspepa* olsem, "Mipela tingting long tromoi pipia i go insait long ol banis pekpek bilong Madang Taun. Sapos nogat, mipela laik tromoi ol pipia i go insait long solwara long Madang haba, o Binen Poin."

Tasol Madang Taun Interim Komisn i tok olsem, dispela tupela

rot wantaim bai givim sik long ol manmeri na pikinini long taun.

Mista Eminoni Topio, Madang Taun Kuskus i tok, "Tupela pekpek banis bilong taun i klostu pulap na i no inap mipela larim mit faktori i yusim long putim pipia bilong mit long en. Sapos em i pulap, bai mipela putim pekpek bilong ol manmeri long taun long wanem arapela banis? I no gat moa."

Mista Topio i tok long Binen Poin, ol pipel i save painim pis na waswas tu na em i no gutpela long helt bilong ol.

Em i tok, "Wangepela samting tasol Nesanel Gavman i ken mekim long stapim dispela bikpela wari. Nesanel gavman i mas wokim wangepela bikpela banis pekpek tru bilong Madang taun pipel."

Mista Topio i tok, dispela banis pekpek bai kos samting olsem K2.5 milion. Tasol em bai stap oltaim, na tu em i ken holim pipia mit i kam long it faktori.

"Sapos Nesanel gavman i kirapim pikinini long taun dispela banis pekpek bilong Madang Taun bai no gat wari tru long dispela helt hevi bihain."

Memba bilong Jomba Konstituensi na olpela namba tu primia bilong Madang, Mista Galen Lang i kros tru long toktok bilong nesanel gavman i laik senisim sampela toktok insait long namba wan egrimen namel long PNG gavman na James Barnes Kampani bilong Australia.

Galen Lang i tok olpela egrimen i mas stap olsem yet. "Mista Okuk, husat i toktok long lukluk gen long egrimen bilong dispela faktori long Madang i mas save olsem dispela faktori bai bringim developmen long provins.

"Mi bilip olem, Mista Okuk i tingting long bringim nupela kampani long mekim faktori long Madang bikos ating dispela nupela kampani i mekim bisnis wantaim Okuk yet."

## 65 famili i no gat kaikai

**LONG Is Sepik, 65 famili long Drekkir Patrol Pos long Maprik Distrik i painim taim nau bihain long bikpela hap graun i bin bruk long maunten sait i go daun na bag-arapim gaden kai-**

**kai bilong ol.**


Dispela ol famili i bilong 3-pela viles, Bana, Werigami na Hambini. Bikpela ren em i wok long pundaun yet long Maprik na Drekkir maunten i mekim graun i malu-malu na bruk i go daun.

Distrik Opisa long

Maprik, Mista Richmond Taylor i tokim *Wantok Niuspepa* olsem dispela graun i bruk i pasim olgeta bikrot i go long dispela 3-pela ples. Ol viles i stap klostu long 3-pela ples ya i no soim olsem bai ol i helpim ol dispela famili long kaikai.



Tropikol fleva insait long bisket  
**PINEAPPLE CRUNCH**







# Ol studen i no mas paulim ol pipel - Saulep

□ **MOROB:** Plis long Morobe Provins i holim na sasim pinis 6-pela man. Plis i tok ol i bin kilim wanpela man long Nu Yia.

Plis i tok man husat i dai em Linonge Hebomu husat i gat 50 krismas bilong em na em i bilong Finshafen. Em i bin traim long stapim wanpela pait long wanpela pati long Jewawenang viles long taim dispela birua i bin kamap. Ol i bin kisim em i go long haus sik tasol em i bin dai long ol birua em i bin kisim long bodi bilong em.

□ **RABAU:** Plis long Rabaul Is Nu Briten Provins i mekim wok painimaut bihain long taim ol stilman i bin stilim K19,000.

Plis i tok olsem manesa bilong wanpela stua wantaim ol wokman bilong em i wok long kauntim mani long Wee Strit na tupela stilman i bin go insait long stua na hensapim ol na ranawe wantaim dispela mani.

Plis i bin ranim ol stilman ol i bin ranawe na abrusim ol plisman.

□ **LAE:** Wanpela meri i stap nau long Angau Memorial Hospital bihain long taim paia i bin bagarapim bodi bilong em.

Plis i tok dispela meri i bin kisim bagarap long Morobe Bakeri setelmen long Lae bihain long taim wanpela lam i bin pairap.

□ **ALOTAU:** Milen Be Provins Plis i holim na sasim wanpela man bihain long taim em i bin traim long bagarapim wanpela meri long Woile viles. Papa bilong meri i bin helpim meri ya long taim em i bin harim meri i singaut.

□ **KUNDIAWA:** Plis long Simbu i holim pas pinis wanpela meri bihain long taim em i bin kilim susa bilong em long Wemambuno Viles long Gembogul.

Plis i ting olsem dispela meri i bin dai bihain long taim susa bilong em i bin subim em na em i bin pundaun na brukim splin bilong em. Nem bilong dispela meri husat i dai em Kum Kumbukon.

□ **LORENGAU:** Long Manus Plis i holim pas pinis wanpela manki husat i gat 14 krismas bilong em bihain long taim em i bin traim long bagarapim wanpela meri long Sahat viles long Manus Provins. Dispela trabel i kamap long Disemba 26. Tasol plis i tok olsem meri ya i bin singaut na man ya i bin ranawe.

□ **KUPIANO:** Stesen Komanda bilong Kupiano - Bereina eria long Sentral Provins Mesa Gregory Buibui i givim bikpela tenkyu i go long olgeta pipel insait long dispela eria.

Mesa Buibui i bin mekim dispela tokaut bikos i no bin gat wanpela trabel i bin kamap long dispela taim namel long krismas i kam inap nupela yia.

Em i tok planti taim ol man i save pasim rot na i save paitim ol ka na trik nabaut. Tasol em i tok dispela yia i bin wanpela gutpela yia tru.

SEKRETERI bilong dipatmen bilong Wes Sepik Leo Saulep i no amamas long wanpela kibung em ol Yunivesiti studen bilong Wes Sepik i kamapim long Vanimo long Disemba 28.

Mista Saulep i tok ol studen i no bin tok save long dipatmen bilong em na ol hetman bilong Sandaun gavman. Ol studen i no bin givim tu sans long ol hetman long bekim toktok na sapatim ol yet na Sandaun gavman.

Ol Wes Sepik Yunivesiti studen i bin kamapim sampela hatpela toktok egensim provinsal gavman insait long dispela kibung.

Ol i bin toktok long askim Nesenel gavman long saspenim Sandaun Provinsal gavman long ol asua i kamap long bisnis han bilong en Wes Sepik Developmen Koperesen. Narapela samting em hevi bilong 50 pesen royalti pe. Na ol studen i laik gavman i

mekim wok painimaut long wok bilong provinsal gavman na Vanimo Timba Prodaks.

Ol i laikim Ombudsman Komisin i painimaut tu long wok bilong Vanimo Forest Prodaks, na ol kontrak em Helt Minista Micah Wes na Provincial Komes Minista John Leki i gat wantaim kampani.

Ol i laikim Forest Minista Ted Diro i holim pas laisens na stapim wok bilong Vanimo Forest Prodaks kampani long taim Ombudsman i mekim wok painimaut.

Tasol Mista Saulep i tok ol studen i no inap soimaut wanem samting tru i rong long wok bilong Sandaun Gavman. Em i tok ol studen i westim taim nating sapos ol samting em ol isingaut long en i no tru na i giamanim ol pipel na papa bilong gaun.

Em i tok ol dispela tok giaman bai paulim ol pipel na sloim ol wok developmen. Ol pipel i

no mas go long Yunivesiti olgeta taim long lainim wanem samting i rong o rait.

Mista Saulep i tok dispela hevi i kamap long Wes Sepik Developmen Koperesen i no samting hait. Dispela hevi i bin kamap long Nesenel gavman, long Palamen haus na ol man bilong sekim ol mani i bin sekim buk bilong dispela koperesen pinis.

Em i tok dispela hevi i bin kamap long pablik Akaun komiti na long kot tu. Olsem na Provinsal gavman i no haitim wanpela samting.

Mista Saulep i tok ol pipel i mas amamas olsem provinsal gavman i bin stapim dispela kampani Wes Sepik Developmen Koperesen pinis long wok bikos ol i no winim mani.

Em i tok gavman i gat gutpela astingting taim ol i kamapim dispela kampani tasol ol i makim rong pipel long rongim wok bilong kampani.



● Leo Saulep



● Paul Langro

Mista Saulep i tok gavman i mas lukaut olsem ol i no mas westim taim na mani long mekim wok painimaut long ol timba kamapani. Em i tok ol studen i no gat gutpela as long mekim kain toktok olsem.

Mista Saulep i tok provinsal Minista John Leki i makim stretpela pasin long kisim dinau long kirapim kontrak wantaim kampani. Em i tok Leki i no bin paulim mani bilong gavman na ol dispela rekot bilong em i stap wantaim Komes Opis.

Mista Saulep i sutim tok long Bonny Kayo, John Tekwie na ol lain studen olsem sapos ol i gat tingting long helpim provins orait ol i mas kam lukim pro-

vinisal gavman wantaim stretpela tingting. Na maski long mekim tok baksait na giamanim ol pipel.

Primia Langro tu i no amamas long ol toktok em ol studen i mekim. Na Vanimo Forest Prodaks tu i welkam long tingting bilong Ombudsman i lukluk long wok bilong kampani.

General Menesa bilong Vanoimo Forest Prodaks, Ken Donahoe i tokaut olsem inap 5-pela yia nau ol i wok tasol ol i no bin painim kain trabel olsem i kam long ol papa bilong gaun.

Mista Saulep, Langro na Donohe i tok welkam long wanem studen o man i gat wari long kam bungim ol.

## Gavman i katim bikpela mani bilong Kalsa na Turis

PLANTI wok projek em ol lain Kalsa na turism i bin plenim long dispela yia bai no inap kamap. Nesenel Gavman i bin katim baset bilong kalsa na turism long dispela yia.

Gavman nau i givim ministri bilong Sivil Eviesen na Turism K4 milion long mekim wok bilong ol long dispela yia. Na Kalsa na Turism i bin kisim tasol K544,100 (faiv

handet na foti fo tausen wan handet kina) long kirapim ol wok bilong ol long dispela yia. Na dispela mani i no inap tru long ronim wok bilong kalsa na turism wantaim.

Olsem na Nesenel Kalsa Kaunsil i stopim pinis olgeta plen ol i mekim bilong kamapim wok turism long dispela yia.

Mak bilong mani em nesenel kalsa kaunsil i bin plen long spenim long dispela yia long ol

projek samting i kamap olsem K772,261 (seven handet seventi tu tausen, tu handet na siksti wan kina).

Las yia gavman bilong Somare i bin givim K2 milion i go long Nesenel Kalsa Kaunsil.

Namba tu sekreteri bilong Kalsa na Turism Mista Nelson Giraure i bin tokaut long WANTOK NUSPEPA olsem ol i no gat inap mani long kamapim ol wok ol i plen long en.

Mista Giraure i tok ol bai stapim sampela samting long kamap inap long mun Mas long dispela yia, bikos i no gat moni.

Em i tokaut olsem Kalsa Kaunsil bai stapim ol studen bilong At Skul na Tieta Kampani long statim skul na wok bilong ol long stat bilong dispela yia inap mun Epril.

Tasol Direkta bilong At Skul Stalin Jawa i tokaut olsem skul bai stat long Februari long dispela yia. Em i tok ol bai bihainim dispela program ol i bin mekim bilong dispela yia.

Mista Giraure i tokaut tu olsem Kalsa Kaunsil i bin askim



● Stalin Jawa

pinis Minista Nahau Rooney long givim narapela K30,000 (teti tausen kina) i go long wok bilong Turism. Minista Rooney i bin tokaut olsem em bai lukluk long skim bilong ol na tok save liklik taim bihain.

Ol lain Turism i bin plenim 4-pela projek aninit long Nesenel Pablik Ekspendisa Program (NPEP) long kamap long dispela yia.

Namba wan program em long painimaut wok bilong turis insait long kantri na em i kos K60,000 (siksti tausen kina).

Namba tu program em long developim wok bilong turis insait long kantri na dispela i kos K92,000 (nainti tu tausen kina).

Namba tri program em bilong kamapim

wanpela opis bai i lukautim olgeta wok bilong ol turis. Dispela opis bai gat faipela nesenel wokman na i kos K140,000 (wan handet na foti tausen kina).

Namba foa program em bilong stadim na kamapim ol plen bilong helpim wok bilong turis insait long PNG na dispela i kos K85,000 (eiti faiv tausen kina).

Mista Giraure i tok olsem Kalsa Kaunsil i mas wok wantaim turis opis olgeta taim long lukluk gut olsem wok bilong turis i no ken bagarapim kalsa bilong PNG.

Em i tok turis bisnis em i gutpela rot bilong bringim mani i kam insait long kantri olsem na dispela wok i mas develop. Tasol yumi mas lukaut gut tu long kalsa bilong yumi i no ken lus.

Nesenel Kalsa Kaunsil tu i bin go het na mekim 5 yia developmen program bilong ol bilong 1986 inap 1990. Gavman bai lukluk long dispela program na tokaut long taim ol i autim 1986 baset long mun Mas.

## Ol Bewani refuji i go long Blakwara kem

SAMTING olsem 400 refuji i stat long lusim kem bilong ol klostu long Bewani gavman stesin na go sindaun long Blakwara Refuji kem ausait long Vanimo taun long Wes Sepik Provins.

Ol lain bilong Foren Afeas opis long Vanimo i no bin tokaut long wanem as tru na ol refuji bai muv. Ol refuji i bin stat muv i go long Blakwara kem long Januəri 4 na 5.

Foren Afeas opis i tokaut olsem bipo i gat samting olsem 300 refuji i stap long Bewani kem. Tasol sampela moa refuji i bin kam las yia na nau namba i

go antap long 400.

Wanpela tokman bilong ol lain i lukautim boda mak, Mista Moses Poi i tok ol bai muvim ol famili i go pastaim.

Tasol sampela ripot i kamap olsem ol i bin muvim ol man tasol i go pas. Ol dispela man bai go bilong wokim ol haus pastaim na ol meri, pikinini na lapun bai kam bihain.

Namba bilong ol refuji long Blakwara Kem bai na sut i go antap long 1000 (wan tausen) o moa.

I gat samting olsem 800 refuji i stap pinis long Blakwara kem long Vanimo.



# Pangu na MA bai wok wantaim long ileksen

TUPELA Oposisen Pati, Pangu na Melanesian Alaiens, i gat plen pinis olsem long 1987 jeneral ileksen, tupela pati bai sanap bung wantaim.


Wanem ilektret Melanesian Alaiens Pati i sanapim kandidat long en bai i nogat man i sanap long Pangu tiket na resis wantaim dispela MA kendidet. Wankain olsem MA kandidat bai i no inap resis wantaim Pangu. Tasol tupela Pati bai kempein long wanpela kendidet tasol.

Wanpela long ol insait man i sindaun glasim 1987 ileksen

progrem bilong tupela Pati i bin autim dispela toktok long Wantok long Trinde, 8, Januери.

Mausman ya i tok, "Tasol tupela Pati i no sindaun na sainim dispela tok orait i go daun long pepa yet. Aidia tasol nau i stap olsem."

Tupela Pati wantaim i statim pinis dispela aidia long bikpela ileksen neks yia. Na Pangu Pati bai tingting moa na stretim olgeta dispela aidia bilong MA-Pangu wok bung long bikpela kibung em bai kamap long Madang long wok bilong mun Februери.



• Bernard Narokobi

Wantok i askim sapos, Mista Bernard Narokobi bai resis wantaim Mista Somare, olsem em i bin mekim long 1982 ileksen long Is Sepik Rijinal.

Mausman i bekim, olsem "Bai mipela lukaut gut tru olsem i nogat narapela man i resis wantaim Sief. Mipela stretim olgeta wok pinis long bihainim dispela lain long taim bilong ileksen tu."

I gat plan tasol olsem sapos Mista Narokobi i sanap long ol ilektret long Nesanel Kapital Distrik, o sampela hap long Is Sepik, we Pangu i lukim memba bilong ol i slek long en, em bai tupela Pati wantaim i kempen ful taim tru long en.

Wantok i no inap long kisim tingting bilong Mista Narokobi long ol dispela aidia. Bikos long dispela taim (Trinde, 8, Januери) Mista Narokobi i stap long Alotau long wok bilong en.

# Plis singaut long gan no gat laisens

LONG PINIS bilong mun Jun, Plis Dipatmen i ting bai ol i bungim samting olsem 2,000 gan em i no gat regista long ol na i stap nau long han bilong ol pipel long ol provins nabaut.

Long yia 1984, Plis Dipatmen i bin bungim sampela moa gan em i no gat laisens bilong ol bihain long bikpela wok bilong lo na oda em ol plisman i mekim long wan wan provins.

Opisa long Plis Dipatmen husat i bosim dispela wok, Suprintenden Tom Hendley i tok plis i singaut gen long olgeta pipel husat i holim ol gan i nogat laisens nau long bringim gan bilong ol i go long plis stesin.

Em i tok, bihain long wok plis i mekim long Oktoba 1984 inap Novemba 1985, ol i kisim planti gan i no gat laisens bilong ol. Tasol i gat samting olsem 10 tausen o 11 tausen moa i stap long ol pipel long ol viles insait long PNG.

Suprintenden Hendley i tok, ol man husat i no bringim gan bilong ol i nogat laisens long plis bai baim kot long K400. Nogat bai ol i kalabus long 4-pela mun.

Stat long Januери 1986 i go inap long Jun 30 long dispela yia yet, ol papa bilong olpela gan na ol gan em i no gat laisens long en i mas givim ol dispela gan i go long plis.

Suprintenden Hendley i tok olsem ol papa bilong gan i no ken pret bikos plis bai no ken sasim ol sapos ol i kamap long plis stesin wantaim ol dispela gan.

Plis i no inap askim ol pipel olsem wanem na ol i kisim ol dispela pistol, raifel, na sotgan sapos ol yet i kisim i go long plis stesin.

Suprintenden Hendley i tok, ol pipel long viles long olgeta hap bilong kantri i holim kain kain gan.

Em i tok sampela man i holim ol olpela gan em ol i bin kisim long taim bilong namba tu bikpela pait na ol dispela gan i olpela tru na i ken

bagarapim ol man yet sapos ol i no lukaut gut long yusim.

Namba tu lain man i bin baim gan na kisim laisens tu bilong yusim ol dispela gan. Tasol bihain long taim dispela laisens i paia, ol i no laik kisim nupela laisens bilong gan bilong ol.

Suprintenden Hendley i tokim Wantok, "Mi no save tru hamas gan, i nogat laisens bilong ol, i stap long wan wan provins."

Bihain long Jun 30 1986, sapos plis i kisim samting olsem klostu 2,000 gan i kam long ol pipel long olgeta provins, em bai plis i wari tasol long sampela 9,000 moa em i hait yet.

Plis i singaut long ol dispela gan bikos lo na oda i wok long bagarap na pretim laip bilong planti gutpela manmeri bilong PNG.

# Trabel long Boram Pawa Haus

WEWAK Plis i holim kalabusim pinis wanpela long ol raskal geng i bin hansapim wanpela wokman long Boram Pawa Haus long Nu Yia nait, Januери 1.

Dispela man em ol i bilip bilong Not Solomons nau i stap long Wewak Plis rumgat. Plis i wok long askim em long husat ol narapela raskal, i bin laik kamapim dispela birua.

Samting olsem 8 klok long nait, ol dispela 4-pela man i go long Boram pawa haus. Wanpela i was ausait na 3-pela i go insait long tokim man husat i bin lukautim ol kontrol bilong pawa masin long pasim masin i salim pawa i go long Wewak taun olsem bai taun i blakaut.

Tasol man i lukautim ol kontrol bilong pawa masin i strong na pait hat wantaim ol 3-pela man ya.



• Michael Somare

# Spesol lo i karamapim Talasia — bikpela pait i kamap.

PRIMIA bilong Wes Nu Briten Provins Mista Bernard Vogae i bin tokaut long 12 klok biknait long Mande Januери 7 olsem Talasia em i wanpela ples bilong pait.

Dispela i kamap aninit long lo ol kolim Inta Grup fighting ekt.

Na Talasia eria bai stap aninit long dispela lo inap 3-pela mun stat long Januери 7 i go inap April 7.

Mista Vogae husat i siaman bilong pis na gut oda komiti i bin tokaut long dispela bihain long ol askim i kam long komyuniti long Talasea eria olsem ol man i kisim lo na oda long han bilong ol yet na ol i ting ol i ken statim pait o trabel long laik bilong ol.

Long stat bilong Krismas kam inap tude ol kain kain pait i wok long kamap long eria insait long Talasea.

Wanpela bikpela pait i bin kamap long Mande 6 Januери namel long ol pipel bilong ples Patanga Kilu na Garile.

Dispela pait i bin kirap bihain sampela yangpela man long ples Garile i bin paitim wanpela yangpela man bilong ples Patanga.

Plis long Kimbe i bin holim pas pinis sampela man husat i bin stap insait long dispela pait.

Plis i tok tu olsem planti ol pipel husat i bin stap long dispela pait i bin kisim bagarap long skin bilong ol na ol i bin

bagarapim tu sampela haus na ol kaikai gaden.

Mista Vogae tok i luk olsem ol pipel long Talasea eria i nogat respek long lo na oda na ating i taim nau gavman i mekim wanpela samting long stretim sindaun bilong ol pipel.

Em i tok tu olsem ol pipel i nogat moa rispek long ol viles kot na ol kaunsila em ol lain i lukautim lo na oda long ol rural eria.

Mista Vogae i tok aninit long dispela Inta Grup Fighting ekt ol plis i gat pawa long holim pas na kalabusim ol manmeri husat i laik pait o statim pait, sutim bel bilong arapela long statim pait na holim spia o naip o tamiok o diwai na i laik kamapim trabel.

Mista Vogae i tok husat man i brukim lo bai inap kalabus wanpela yia i go inap 5-pela na bai ol i no inap long baim kot fain.

Na sapos ol grup o lain wanpisin i bung na traim long pait bai kot i sasim ol inap long K20,000 o salim ol i go long kalabus inap 6-pela mun.

Insait long dispela eria ol pis na gut oda komiti bai luk save long ol lida olsem ol kaunsil na viles kot opis. Sapos ol i stap insait long pait bai ol i rausim ol long wok bilong ol. Plis rait skawat long Rabaul bai i kamap long Kimbe long 5 Januери long helpim ol plis long Kimbe long stretim dispela hevi.

# Prais bilong Kamanda



Tupela opisa bilong Australia Ami husat i wok long Papua Niugini i kisim pinis wanpela spesel namba long gutpela wok ol i mekim insait long PNG Difens Fos.

Ol tupela man ya em Kepten Clarke Alexander na Kepten John Ramsay. Ol tupela opisa ya i bilong Royal Australian Odnens Ko.

Brigidia Jeneral Tony Huai husat i bin givim dispela namba i go long tupela man ya i tok olsem ol i bin kam wok hia long PNG. Ol tupela opisa i go bek gen long Australia long Fraide 10 Januери.



**Raun tasol**  
Malolo long

# PAPUA HOTEL

- Kala TV, Tollet na Shower, Air-con na telepon long olgtarum tu.
- Disko Bar na Nait Klap na Kalkal na Haus Dring.
- Lukim biknem Bulolo Ba
- Liklik pe — Bet na Brekfas

**PAPUA HOTEL**  
(Lessee Suckling Enterprises Pty Ltd)  
Telepon: 21 2622 na mekim buking



## Skelim gut na senisim

Long taim wanpela nupela man i kisim wok bilong bosim ol samting bai em i traim ol aidia bilong em insait long dispela wok. Yumi olgeta i save olsem long taim nupela bos i kamap bai em i mekim ol senis long sampela samting na putim ol aidia bilong em yet i go insait long ol eria we em i ting wok i no kamap gut.

Em i gutpela. I no gat tok long dispela ol samting. Toktok i save kamap sapos ol dispela senis em nupela bos i laik mekim bai i helpim em yet na i givim baksait long ol gutpela wok i bin kamap bipo.

Na narapela samting tu sapos ol senis i kamap klostu klostu bai wok i no inap long gohet. Ol nupela lain bai tingting long traim ol save bilong ol long mekim wok na bai olgeta wok i stap olsem tasol.

Olsem na i gutpela long ol nupela lida bilong yumi long gavman i skelim gut pastaim wok i stap pinis long wanem dipatmen ol i bosim. Orait bihain ol i opim maus bilong ol long senisim ol samting.

I tru bai ol i painim planti asua em ol i ken senisim. Tasol i gat planti gutpela program em gavman i bin kirapim pinis na i nupela bos i ken bihainim tasol ol dispela program.

I no gat rong long dispela bikos ol dispela program em i bilong helpim ol pipel insait long kantri bilong yumi PNG. Sapos ol dispela nupela bos i stretpela man bai ol i ken skelim gut ol dispela samting pastaim. Na bihain ol i ken tingting long senisim wanem samting tru em ol i painim olsem i asua liklik.

NUPELA RISES institut long Madang i promis long helpim ol saintis na studen husat i laik stadi long ol bus na binatang wantaim olenimal na tu ol samting bilong solwara, insait long Madang na Papua Niugini.

Praim Minista Paias Wingti bai opim dispela nupela "Christensen Research Institute" long Fonde 10 Janueri.

Long taim institut i op em bai kisim ol saintis long olgeta hap bilong wol long kam lukluk raun na stap long dispela institut long mekim wok stadi bilong ol.

Dokta Lance Hill em i mausman bilong Yunivesiti long dispela etvaisari komiti bilong "Christensen Research Institute" long Madang.

Dokta Hill i bin go long wanpela kibung long San Fransisco, Amerika, long Novemba 1985 long kamapim ol lo em dispela institut bai bihainim long taim ol saintis i mekim wok stadi bilong ol.

Dispela institut i stap nau long Jais Aben Risot asait tasol long Madang taun. I no long taim bai dispela 16

rum risot i pulap long ol saintis husat bai kam long olgeta yunivesiti long wok long mekim stadi bilong ol.

Ol dispela saintis bai yusim Jais Aben olsem bes bilong ol long mekim rises wok long ol kain kain projek na stadi long ol enimal bilong bus na solwara tu.

PNG em i gutpela kantri bilong ol saintis i mekim stadi long ol tropikel bus, enimal na samting bilong solwara. Dokta Hill i tok olsem ol saintis bai mekim stadi long ol samting bilong Noten sait bilong PNG long Madang.

Dispela rises na stadi i gutpela bilong Madang Provinsal Gavman long turis indastri na bisnis tu, dokta Hill i tok, nesanel gavman tu i ken yusim ol stadi bilong ol dispela saintis long wanem kain wok ol i laik mekim long Madang.


Em i tok, ol i tingting tu long prinim ol piksa na stori long toksave long wanem kain enimal ol saintis i painim long Madang na tu long PNG. Dispela stadi bai helpim ol skul pikinini long stadi long ol dispela nupela save.

"Mipela laik putim long tingting bilong ol dispela lain saintis olsem ol kain save ol kamapim long stadi bilong ol bai helpim ol skul pikinini bilong PNG. Olsem bai ol i raitim planti nupela samting ol i painimaut long graun bilong PNG." Dokta Hill i tok. Etvaisari komiti bilong institut i pinisim nau ol lo bilong stadi long institut em nau ol i redi long opim long ol stadi long go het. "Mipela bai kamapim wanpela kain rekot olgeta stadi em ol saintis husat i kam long dispela institut i mekim.

"Dispela rekot bai helpim ol man husat i laik stadi long kain samting olsem enimal bilong PNG na tu ol studen i ken yusim long skruim save bilong ol bihain sapos ol i laik." Dokta Hill i tok.

Dispela institut i no bilong mekim mani olsem ol bisnis kampani. Em i bilong pablik long PNG, tasol bikpela yunivesiti long wok i bung wantaim na kamapim.

Ol dispela yunivesiti em Stanford Yunivesiti long Kalifonia, Akademi bilong Saiens



Dokta Lance Hill

long Kalifonia, Oxford Yunivesiti, Inglan, CSIRO bilong Australia na Yunivesiti bilong PNG.

Wan wan bilong dispela yunivesiti i tok ol inap long salim 5-pela studen o saintis bilong ol long wan wan yia long stadi long dispela nupela institut long Madang.

Ol namba wan nupela lain saintis husat bai stadi long dispela institut long dispela mun bai lukluk long sampela samting ol i

ting inap long stopim sik kensa long wol, Dokta Hill i tok.

Mani bilong ranim dispela rises institut bai kam long Christen Saiens Faundesen long Palo Alto, Kalifonia.

Het man bilong faundesen, Mista Alan Christensen i bin makim helpim mani na givim i go long institut na bai em i mekim olsem inap long dispela risot hotel long Jais Aben inap long ranim bisnis bilong en yet.

**WANTOK NIUSPEPA**  
Nius i kamap 52 taim long yia

Opis bilong Edita na edvetaising long PNG

P.O. Box 1982, Boroko  
Telepon: Mosbi - 25 2500.  
Teleks: NE 22213  
Edvetaising - Telepon: 25 2500

**PE BILONG WANPELA YIA, 52 NIUSPEPA**

Ples	Air Surface
Port Moresby	K20 K20
PNG	K29 K29
Australia & Sol Islan	K60 K39
New Zeland & Pacific	K78 K46
America & Europe	K118 K60

Printed and published by Rowan Sidney Callick, of Winter street Granville, at Allotment 2, Section 209, Hohola.

## Ol trabel long Ramu i pinis nau

BIKPELA BELHEVI namel long wokas yunian na menesmen bodi bilong Ramu Suga kampani bai no inap kamap moa. Ol i wanbel bihain long ol i sainim wanpela tok orait bilong stretim belhevi long dispela wik Tunde, 8 Janueri.

Moa long 900 memba bilong Ramu Suga Nesanel Emplois Yunian husat i redi long skruim bikpela stapwok i go bek gen long wok. Long wanem ol i amamas long tok orait i kamap long dispela kibung. Tasol ol i sambai long lukim sampela gutpela rot bilong kliaim dispela hevi namel long ol wik bihain.

Dipatmen bilong Leba na Emploimen i askim kampani na yunian long bung wantaim na stretim dispela namba wan hevi bilong ol long 29 Novemba, las yia. Tasol tripela lida bilong yunian i no bihainim tok. Long wanem ol i laikim kampani i kisim bek sampela wokman em kampani i bin rausim long wok.

Dispela tubel pasin i pusim yunian long mekim kamap bikpela stapwok long 4 De-

semba i go long 7 Desemba. Dipatmen bilong Leba wantaim mausman bilong kampani traim holim kibung long stretim hevi namel long dispela stapwok. Tasol ol lida bilong yunian i no laik sindaun long kibung. Ol i tok long kampani i bihainim askim bilong ol pastaim na ol i ken kibung.

Dispela hevi i kirap bihain long Ramu Suga Nesanel Emplois Yunian i askim kampani long apim pe bilong wokmanmeri namel long Julai, las

yia. Bosman bilong kampani i sakim dispela askim bilong yunian na mekim tok pret long rausim tripela yunian lida na sampela wokman.

Bihain long dispela tok kros i gat stapwok bilong ol memba bilong yunian i kamap long Ramu Suga eria na tupela fam bilong kampani long Leron na Bora insait long Makam Veli, Morobe Provins. Kampani i go het na rausim sampela wokman namel long mun Julai na Oktoba long las yia.

Namel long 4 Desemba i go inap 13 Desemba las yia i gat singaut long kampani na yunian i bung long stretim olgeta hevi. Tasol yunian i skruim de bilong kibung inap long tripela taim. Long wanem yunian i laik kisim sampela taim moa long raitim kamap ol komplek na astingting bilong ol long daunim dispela belhevi.

Rait Skwat plisman i go brukim dispela trabel long 24 Desemba. Ol i holimpasim na sasim tripela

lida bilong yunian. Plis i sasim Yunian presiden, Mista Robert Nureo long krungutim banis bilong ol bosman na yusim tok nogut. Namba tu presiden, Geoffrey Komino i kisim sas long krungutim banis tu. Na Kelly Degemba i kisim sas long spek antap log pes bilong Ramu Suga menesa, Mista Brian Awford.

Presiden bilong PNG Tred Yunian Kongres, Mista Henry Moses i autim kors i go moa long pes 8

## Mani i sot

OL SKUL insait long Papua Niugini bai i no inap stat skul gut long Februari.

Seketeri jenerel bilong Papua Niugini Tisa Asosiesen Mista Moses Taian i bin mekim dispela tokaut long dispela wik.

Em i tok gavman i bin katim mani bilong Edukesen Dipatmen i go daun inap K14 milien long wok i go inap mun Mas long gavman bai autim nupela baset.

Mista Taian i bin tok dispela i min olsem ol wokmanmeri insait long Edukesen Dipatmen bai i wok hat tru long traim na givim gutpela servis i go long ol tisa insait long liklik taim wantaim liklik mani tasol.


Tasol Mista Taian i tok bikos gavman i bin katim baset bilong Edukesen Dipatmen planti ol skul i tingting long rausim sampela posisen bilong ol tisa.

Mista Taian i tok sapos ol i rausim sampela posisen long ol skul bai planti ol tisa i stap nating long pul o bai ol i no inap long wok.

Mista Taian i tok tu olsem planti ol tisa husat i save tis long komyuniti skul na hai skul longwe long ol taun na ol stesen i wok long komplek olsem ol i no save kisim ol alauens o liklik hap mani bilong stap longwe long ol taun. Olsem na planti ol tisa i no amamas tumas long dispela pasin.



# Politik inap bagarapim ol Bot



• Kindi Lawi

• Iambakey Okuk

I GAT planti samting em Mista Okuk inap long mekim long helpim Kopi, Kakau na kopra bisnis sapos em i no tingting tumas long sutim tok i go long ol Bot bilong ol dispela bisnis.

Dispela toktok i kam long memba bilong Westen Hailans, Kindi Lawi. Mista Lawi i mekim dispela hap tok long Mista Okuk bihain long Okuk husat i Minista bilong Praimeri Industri i toktok long senisim ol samting insait long wok bilong ol dispela tripela Bot.

Mista Lawi i tok tu olsem sapos Okuk i wari tru long dispela bisnis orait mobeta em i bihainim plen bilong olupela gavman long kamapim gutpela dispela ol bisnis na maski bringim wok politik i go insait long ol Bot bilong ol dispela bisnis.

Mista Lawi i tok olsem gavman bilong Somare i bin makim K378,000 long kopi bisnis insait long 1986. Na ol i tingting long yusim tu long planim ol nupela diwai kopi long ol bikpela plantasin na ol liklik fam bilong ol pipel long ples.

Em i tok tu olsem gavman bilong Somare i bin tingting long lusim K2.8 milion insait long dispela 5-pela yia bilong kamapim gut bisnis bilong kopi insait long Papua Niugini.

Mista Lawi i tok olsem em i no egensim tingting bilong gavman long senisim ol memba bilong Bot sapos taim bilong ol long wok long Bot i pinis. Em i tok dispela em i samting bilong husat i stap insait long gavman.

Em i tok tu olsem sapos wok politik i go insait long dispela lo bisnis bai olgeta samting i bagarap. Mista Lawi i tok mobeta ol i larim tu dispela ol mani insait long ol Stebilaisesen Fan i stap bilong mekim ol wok bilong helpim ol dispela ol growa.

Em i tok sapos gavman i no tingting long yusim dispela mani long helpim ol growa orait mobeta ol i larim i stap na maski long yusim long ol arapela.

# Pe bilong kopi i gutpela

## na Kopi Bot i laik ol pipel kamapim moa kopi

PAPUA NIUGINI Kopi Industri Bot i singaut i go long olgeta Kopi growa insait long Papua Niugini long traim na kamapim moa kopi insait long dispela yia long wanem pe bilong kopi i go antap nau.

Dairekta bilong Kopi Industri Bot Mista Ricky Mitio i bin mekim dispela tokaut bihain long taim ol i bin apim namba bilong ol kopi bek Papua Niugini i save kamapim em 633,000 i go antap long 702,000 bek olgeta.

Mista Mitio i bin tok olsem bot i bin paim pe na namba bilong bek kopi bikos i gat bikpela sot bilong kopi insait long wol nau long stat bilong 1986.


Mista Mitio i tok olsem Brasil em wanpela kantri long Saut Amerika husat i save

ekspotim moa kopi i go long arapela kantri long wol nau i gat bikpla taim nogut. Nogat ren olsem na pe bilong kopi long wol i go antap.

Mista Mitio i bin tok olsem bilong wanpela kilogram kopi em K3.20 (F.O.B.) nau.

Tasol long ples olsem Hailans we i gat planti ol kopi growas na baias bai pe bilong wanpela kilogram kopi i go antap moa yet.

Dispela i min tu olsem bai ol growa i givim liklik moa mani i go long Stebilaisesen Fan bilong redi long



• Ricky Mitio

taim nogut i kamap long Papua Niugini.

Tasol Mista Mitio i tok olsem em i bin putim askim i go long Bot long traim na saspenim fi i go long Stebilaisesen Fan.

Em i tok sapos dispela i kamap bai ol growa i kisim moa bikos pe bilong kopi long wanpela kilogram bai i go antap moa yet bikos ol pipel bai i no peim takis i go long Stebilaisesen fan.

Long dispela yia Mista Mitio i tok ol inap long mekim samting olsem i go inap K8

milion kina olgeta. Sapos olgrowas baim fi bilong Stebilaisesen fan.

Nau pe bilong wanpela rais bek bai i go antap inap K50 na wanpela kopra bek bai i go antap inap K95.

Dispela pe em long ol gutpela drai kopi em ol growa i kisim i go long faktori.

Mista Mitio i mekim singaut i go long olgeta growa olsem ol i mas lukautim gut ol kopi gaden bilong ol sapos ol i laik kisim gutpela mani insait long dispela yia.



# Not Solomons i strongim kakau bisnis long Provins

OL KAKAO inspekta long Not Solomon Provins i wok long raun long provins na sekap gut long ol kakao em ol pipel bilong ples yet na ol plantasin i wok long salim.

Provinsal Minista bilong Praimeri Industri, Mista Michale Laimo i tok olsem em i amamas long lukim ol inspekta i mekim gut

wok bilong ol. Mista Laimo i tok tu olsem Not Solomons i gat nem pinis insait long PNG olsem wanpela provins i go pas tru long wok bilong planim na salim kakao.

Mista Laimo i tok olsem dispela wok em ol kakao inspekta i mekim long rausim ol bek kakao i no drai gut o i drai tumas em

i gutpela. Bikos ol dispela opisa i helpim kantri long salim ol gutpela kain kakao tasol i go long ovasis kantri.

Em i tok, 'Mi minista bilong lukautim wok bilong Praimeri Industri long provins, na mi no laik lukim ol pipel i guria long kisim mani tasol na ol i les long wok gut long kamapim

dispela kakao.'

Mista Laimo i stat nau long lukluk raun long ol ples insait long Not Solomons long Januери. Emigo statim dispela raun bilong, em long Nagovis na Siwai.

Bai em i go raun long ol arapela ples insait long Not Solomons Provins na toktok long ol pipel long

dispela yia.

Not Solomons Provins i gat lo we ol minista bilong provinsal gavman i save raun wantaim ol saveman bilong ol kain wok na toktok long ol pipel bilong ples long wanem kain rot ol i ken bihainim long planim ol gutpela bisnis diwai olsem kakao o kopra na ol arapela samting.

## PAPUA HOTEL



WIK DE KAIKAI

Mande inap Fonde K5.00

Spesel kain kaikai olgeta Fraide K8.50

Bilong wanem wetim sevis? Bilong wanem lusim moa mani Kisim bikpela, gutpela kalkal long liklik pe

PAPUA HOTEL (Lessee Suckling Enterprises Pty Ltd) Telephone: 21 2622 na mekim buking.



# Ol opisa long Wes Sepik i skul gen

PNG i mas gat planti opisa husat i gat save long ranim gut kantri. Ol dispela lain opisa i mas yusim save ol i bin kisim long mekim wok long helpim ol pipel insait long komyniti bilong ol na Papua Niugini.

Asisten Seketeri bilong Helt long Wes Sepik, Dokta Marcus Woibun i bin mekim dispela toktok long pinis bilong wanpela kos bilong ranim na lukautim opis. Dispela tu wik kos i bin pinis long namba 13 Disemba long Vanimo.

Dokta Woibun i bin tokim ol manmeri husat i bin stap insait long dispela kos olsem Wes kSepik i wanpela long ol provins i kam bihain tumas long olkain wok insait long PNG.

Em i tok Wes Sepik Provins i gat bikpela namba tru long sik bun-nating, planti pikinini tumas na kain sik olsem sotwin, strongpela kus na sik malaria. Em i tok divisen bilong em i wok long traim hat tru long daunim ol dispela sik.

Em i tok, "Wes Sepik na PNG i mas gat ol gutpela opisa husat i bin kisim pinis gutpela skul long ranim gut kantri. Gutpela wok bilong wanpela kantri i stap tasol long han bilong ol dispela kain opisa, olsem na ol i mas mekim wok bilong ol bihainim wanem samt-ing ol i bin kisim skul long en."

Dokta Woibun i bin tokaut olsem, kantri bilong yumi nau i bungim wanpela hatpela taim stret long wanem mani i sot long olgeta kona. Na em i givim bikpela skim bilong em i go long wan wan long ol lain husat i bin kamap long dispela kos i mas traim hat liklik moa long mekim wok bilong ol gut long helpim PNG.

Ol opisa long dispela tupela wik kos i kam long ol gavman divisen insait long Wes Sepik yet. Olgeta wantaim em 18 na ol i kam long Edukesen, Praimeri Industri na planti long ol i kisim long Dipatmen bilong Helt yet.

# Tena Yut i soim rot bilong self rilaiens na bringim developmen long viles

Poto na Stori  
— Tobias Kuelik

INSAIT LONG Wosera Sab distrik i gat wanpela yut grup em i wok gut tru na i kamap smat long wokim ol yut projek na developim komyniti bilong ol.

Tena yut grup i bin kamap long 1979 na oli rejista long 1980 long Provinsal Yut Kaunsil. Inap long 5-pela yia nau Tena Yut grup bilong Rupukum viles i bin wokim yut projek na em i kamap gut tru.

Tena Yut grup i bin bungim sampela mani long wan wan memba bilong ol yet na ol i rejista insait long Is

Sepik Provinsal Yut Kaunsil.

Man i go pas long ol em Vitus Bisna na narapela man em Teddy Malken. Planti long ol grup memba i pinisim skul bilong ol long Komyuniti Skul na i gat sampela i pinisim gret 10 long haiskul.

Teddy Malaken tresera bilong grup na em i pinisim gret 10 bilong em long Maun Hagen haiskul long 1978. Planti ol arapela olsem Kenny Galgal i pinisim Gret 6 na bihain em i go long Binyik Vokesinel Senta long Maprik yet.

Olgeta memba i bihainim kristen pasin na oltaim long ol kain wok na miting ol i save putim Jisas i go pas long ol. Olsem na ol i mekim wok wantaim narakain pasin na staili winim ol arapela yut.

Tena Yut grup i gat ol projek olsem Tret Stua, em i ran smat tru - wanpela bikpela kopi plantesin, wanpela kakao plantesin, kopi kontrak baia, trak PMV na sab kontrak bilong wokim haus. Sapos komyniti o komyniti skul i askim ol bai ol i go mekim wok.

I gat wan wan menesa bilong ol dispela projek. Na olgeta memba i rispek-tim na trastim ol liklik

bosman i bosim wan wan projek. Tasol i gat wanpela beng akaun na Teddy wantaim Vitus i bosim. Mani i no save lus o paul bikos Teddy Malken i skul gut tru long pasin bilong bosim mani na spendim na mekim ripot i go long ol memba na tu long Maprik Distrik Yut Kaunsil.

Teddy i tok olsem namba tu Spika bipo long Is Sepik Provinsal Gavman na memba bilong Saut Wosera David Frangili i bin helpim ol long K100. Na nesenel memba bilong Wosera-Gawi Paul Wanjik i bin givim ol K500 long wokim stua. Is Sepik Provinsal Yut Kaunsil i bin givim ol K851.40

long 1984.

Nau Tena Yut grup i gat K2.020 long Wespac Beng, K1,200 long PNGBC na K4,015 long Savings na Loans Sosaiti. Teddy Malken i tok olsem yut grup bilong ol i no gat sampela wari o hevi namel long ol grup memba bikos ol i bilip Jisas na Holi Spirit i wok wantaim ol.

Em i tok sapos i gat hevi o bel kros i stap namel long ol memba na ol i laik lusim grup, ol arapela i save beten long ol na lusim rong ol i mekim long grup na ol i kamap wanbel gen. Olsem wok i no inap bruk bikos olgeta memba i wok wantaim bel isi na amamas long bel bilong ol inap long

5-pela yia nau.

Ol komyniti, kaunsila, viles mejistret, sios na gavman i laikim tru wok bilong Tena Yut grup na ol i sapatim tru. Tena i soim rot long ol arapela na em i kamapim tru as bilong self-helpim, patisi-pesen na self rilaiens.

Teddy i tok olsem em i save pret tru long God long taim em i holim mani bilong grup olsem em i mas lukautim stret. Em i tok sapos mi no pret long God bai em i ken aigris na mangal nogut long mani olsem yangpela meri na grup bai pundaun pinis bipo. Planti yut grup i pundaun or bruk bruk bikos i no gat gutpela menesmen long mani.



● John Wanpis (lephan) na tupela arapela yut bilong Tena Yut grup.



● Teddy Malken na ol arapela yut insait long stua em ol yet i wokim.

## Nu Yia amamas i bagarapim haus kot

POPONDETTA haus kot bai lusim moa long K100 long stretim glas windo bilong en. Long wanem dispela glas windo i bruk nabaut namel long bikpela amamas bilong makim Nu Yia.

Distrik kot mejistret long Popondetta, Mista Max Hambo i no amamas long dispela bikhet pasin em komyniti bilong taun i mekim. Em i tok dispeia pasin bilong bagarapim haus na ol samtng bilong gavman i soim olsem ol pipel i no wari. Na dispela kain bikhet i bringim sem wantaim nem nogut long Noten Provins.

Mista Hambo i tok bikpela amamas bilong Nu Yia insait long Noten Provins i no gutpela tumas. Ol pipel bilong Popondetta na arapela eria i mekim nupela kain bikhet pasin bilong meknais tumas na bagarapim samtng bilong gavman na ol arapela manmeri.

Em i tok Oro Provins i no gat nem nogut bilong dispela kain bikhet pasin bipo. Tasol nau ol pipel i laik kisim lo antap long han bilong ol ya na dispela pasin i rongim ol samtng.

Em i laik kotim ol pipel husat i bin brukim dispela glas windo bilong kot haus. Tasol em i hat tru long painim ol tabelman long wanem dispela bagarap i kamap long biknait. Na planti yangpela manmeri i mekim kamap kain kain meknais na dispela asua antap long haus kot. Em i askim ol pipel long soim rispek long

lo, gavman na arapela manmeri long bihaintaim.

Dispela kain bikhet i no kamap long Popondetta tasol. I gat wankain asua i kamap long Tatana viles klostu long Mosbi siti tu.

Dispela asua long Tatana klostu i autim lep ai bilong viles kot mejistret, Mista Igo Oala long Nu Yia nait. Ol yangpela man i bin tromoi ston antap long en long taim em traim long stapim ol. Ol dispela bikhet man i wok long pulim draipela wara tang na mekim nais long wanpela hap bilong Tatana viles i go kamap long narapela hap kona.

Ol dispela yangpela man bilong Tatana i tromoi ston long Mista Oala wantaim tupela arapela viles kot opisa tu. Lain wanpelin bilong Mista Oala klostu i kirapim bikpela pait wantaim lain wanpelin bilong ol dispela bikhetman. Tasol, Mista Oala yet i bin stapim dispela tabel.

Mista Oala yet i lusim mani long lukim wanpela pravit dokta long Mosbi long stretim dispela sua long lep ai bilong em.

I gat meknais na arapela liklik asua long ol arapela provins tu. Tasol planti viles kot opisa na gutpela manmeri bilong komyniti wantaim lain memba bilong Plis Fos i bung wantaim long daunim bikhet pasin. Na i nogat planti birua i kamap long plant hap bilong PNG namel long amamas bilong Nu Yia.

## CALLING ALL BANDS

MIPELA SALIM  
OL SAMTING  
BILONG  
MUSIK

AMPLIPAIA  
SPIKA  
DRAM  
GITA  
TRUMPET  
TROMBONE  
FLUT  
LET BILONG GITA  
STRING

BATERI  
AMPLIPAIA  
bilong gita  
Lead - K95.00  
Bass - K100.00  
Special Lead  
- K100.00

SKIN BILONG DRAM  
OL SONG BUK NA CORD BUK

\* Mekim pairap bilong gita nating olsem pawa gita wantaim GUITAR PICK-UP K22.00.

## ROOK'S RADIO

P.O. BOX 191, LAE, P.N.G.  
TELEPON: 42 4616



# Vogae i senisim ol minista

PRIMIA BILONG Wes Nu Briten, Mista Bernard Vogae i senisim gen ol minista insait long kabinet bilong em. Mista Vogae i mekim ol dispela senis long Kombe bipo long Nu Yia.

Hia em ol nupela minista na ol wok bilong ol insait long gavman bilong Mista Vogae.

Primia Bernard Vogae - Fainans Plening na Edministretiv Sevis.

Namba tu Primia Joseph Lehen - Lokal

Gavman Kaunsil, Lensa na Viles Kot.

Mista Samson Patiliu - Minista bilong Edukesen.

Mista Francis Auram - Minista bilong Praimeri Industri.

Soa Ubia - Minista bilong Komyuniti Sevis.

Andrew Nuli - Minista bilong Komes na Industri.

Nupela minista insait long dispela kabinet

em Mista Robert Lawrence husat bai holim wok bilong bosim Woks. Mista Lawrence em i memba bilong kandrian Kostal insait long provinsal

gavman. Mista Peter Lingaso husat i bin holim wok bilong Viles Kot na Lika i aut nau long wok bilong em.

Long taim em i bin

mekim dispela senis insait long provinsal gavman, Mista Vogae i bin tok olsem ol dispela senis i kamap bihain long tripela yia. Na em i tok olsem dispela

senis long ol wok bai mekim ol minista i smat na mekim gut wok bilong ol.

Tasol Mista Vogae i tok olsem dispela em i no las taim em bai senisim wok bilong ol minista insait long gavman bilong em. Em i tok olsem bihain long 6-pela mun, bai em i skelim gen wok bilong ol minista bilong em.

Mista Lingaso husat i bin aut long wok minista bai kamap namba tu Spika bilong Provinsal Asembli.

Mista Vogae i tok tu olsem ol i bin tingting long mekim ol dispela senis bihain long kibung bilong Pangu Pati long Kimbe. Tasol em yet i bin mekim ol dispela senis insait long gavman bilong em.

Ol dispela minista bai statim nupela wok bilong ol long 9 Februari.

## Kiunga i gat nupela bakstua

OL pipel bilong Kiunga i amamas tru long lukim namba wan bikpela saplai i op long taun bilong ol long 16 Desemba.

Dispela bakstua i gat kain kain tul bilong wok egrikalsa, wok kamda, wok ensinia, wok mekanik na ol samting bilong marin sevis na motoka sevis tu. Em i gat

kain kain pen bilong penim haus na ol arapela samting inap long laik bilong olgeta kastama.

Menesa bilong Progresiv Hadwea na Saplai bakstua, Mista Wesley Puni i tok planti pipel i kirap nogut long lukim kain samting ol i gat laik long en insait long stua. Tasol ol dispela pipel i amamas tru long wanem dispela stua bai givim bikpela helpim na sevis long ol.

Mista Puni i tok ol pipel i mangalim dispela sevis. Na stua i bin salim tupela autbot moto sampela de bipo long stua i op. Prais bilong ol samting i wankain long Stimsip Hadwea bakstua long Waigani, Mosbi.

Tasol ol pipel long Kiunga bai lusim sampela toea moa long ol samting. Long wanem dispela Kiunga bakstua i mas sasim liklik pe long karamapim kos bilong bringim ol samting long sip na balus. Olsem na prais bilong Kiunga i mas go antap liklik.

Brens menesa bilong Hornibrooks kampani long Kiunga, Mista Chris Wallenbrink i tok dispela bakstua i nambawan smatpela samting i kamap long Kiunga taun nau. Long wanem, kain kain samting insait long stua em Hornibrooks i givim long pipel.

## Bikpela mekim save long kaikai buai

OL pablik sevan insait long Noten provins bai kisim bikpela mekim save, sapos ol i kaikai buai long taim bilong wok.

Primia bilong Oro Provins Mista Dennis Kageni i kamapim dispela tok lukaut insait long wanpela tok save pepa long Tunde, 2 Januari.

Em i tok dispela doti pasin bilong kaikai buai na spet nabaut i kamap long olgeta opis bilong Dipatmen bilong Oro na Oro Provinsal Gavman tu. Na em yet i bin lukim planti wokman bilong gavman i givim baksait long wok na kaikai buai.

Mista Kageni i tok, sapos ol bosman bilong wan wan opis i painim wanpela wokman i abrusim dispela tok lukaut, em bai seketeri bilong Oro Ditapmen i sasim em aninit long Pablik Sevis Ekt.

Presiden bilong Higaturu Lokal Gavman Kaunsil, Mista Nathaniel Victor i tok planti gavman wokman insait long provins i save mekim dispela doti pasin nau.

Em i singautim Primia Kageni na Dipatmen Seketeri, Mista Jacob Kairi long putim strongpela lo bilong daunim dispela doti pasin insait long olgeta gavman opis. Oli mas tambuim ol gavman wokmanmeri long kaikai buai long taim bilong wok.

Sapos ol wokmanmeri i laik kaikai buai na spet nabaut, ol i mas yusim tingting. Oli ken kaikai buai long taim ol i pinis wok na stap long wan wan banis bilong ol.

## Aitape yet bai bosim na dilim RIP mani

AITAPE DISTRIK bai bosim olgeta mani bilong Rural Improvmen Progrem (RIP) na bai em yet i bosim wok bilong brukim na dilim dispela mani i go long wan wan projek insait long distrik.

Dispela nupela pasin bilong Aitape distrik yet i seklim RIP mani i kamap bihain long ol memba bilong Aitape distrik i winim tok orait bilong Sandaun Provinsal Gavman.

Memba bilong Aitape Sentral na namba tu Primia, Adam Amod i bin askim Sandaun Gavman long dispela samting. Na Sandaun Eksekyutiv Kaunsil i bin givim tok orait long dispela askim bilong Mista Amod long mun Novemba las yia.

Mista Amod i tok olsem bipo olgeta mani bilong Rural Improvmen Projek i save go long han bilong Aitape Distrik Menesmen Tim na Sissano Sab Distrik Manesmen Tim. Na dispela tim i save brukim mani na dilim i go long wan wan projek insait long distrik. Tasol nau bai dispela i senis bikos i gat wanpela nupela komiti husat bai bosim wok bilong dilim mani insait long Aitape distrik yet.

Dispela nupela komiti em Aitape Distrik Developmen Komiti. Na olgeta memba bilong Aitape yet insait long Sandaun Provinsal Gavman i stap insait long dispela nupela komiti.

Ol dispela memba em siaman Adam Amod i go pas long ol. Na ol arapela memba bilong komiti em Alphonse Minda, Andrew malan na Melchior Simbel.

Siaman bilong Komiti, Mista Adam Amod i tokim Wantok ripota long Vanimo olsem bikpela wok bilong komiti em long mekim ol plen na lukluk long ol projek insait long Aitape distrik. Orait long olgeta 4-pela mun, bai komiti i mas bringim ripot bilong mani ol i yusim long ol projek i go long plening na Progrem Divisen long Vanimo.

Mista Amod i tok tu olsem Sandaun Gavman bai traim dispela nupela rot bilong bosim RIP mani insait long Aitape distrik pastaim. Na sapos provinsal Gavman i lukim olsem dispela rot i gutpela orait bai ol arapela distrik tu insait long Sandaun Gavman i kisim na bosim wok bilong dilim RIP mani insait long distrik bilong ol yet.

NAMBA tu Primia bilong Milen Be Provins Mista Dickson Daduwe i bin tok i tru olsem i gat planti ol selbot bilong ol arapela kantri i save kam insait long solwara bilong Milen Be Provins.

Tasol em i tok olsem em i no save tru sampela bilong ol dispela selbot i save karim ol kain strongpela spak marasin.

Mista Daduwe i bin mekim dispela tokaut bihain long taim ol plisman bilong Papua Niugini na Australia i bin makim wanpela bikpela wok painimaut moa long wanpela selbot i bin kam anka long Suau long Saut

kos bilong Milen Be.

Plis i tok olsem dispela selbot i wok long karim moa long K40 milion kina bilong ol strongpela spak marasin. Na ol i ting dispela bot i wok long ron i go long Australia long taim bensin bilong em i bin pinis na i bin drip i go kamap long Milen Be.

Mista Daduwe i bin tok olsem planti ol dispela kain selbot i save kam na tromoi anka long Is Kep na i save salim ol kaikai olsem rais na mit i go long ol manmeri bilong ples.

Em i tok olsem insait long wanpela mun,

tupela o tripela bikpela selbot i save go kamap long han bilong Milen Be Provins.

Mista Daduwe i bin tok olsem em i laikim ol opisa bilong kastams long sekap long olgeta selbot i save kam long ol solwara bilong Papua Niugini.

Em i tok sapos ol dispela kain selbot i kam nating long solwara bilong Papua Niugini na ol opisa bilong gavman i no sekap bai gavman i save olsem wanem dispela ol selbot i karim ol spak marasin.


Em i tok planti bilong ol dispela selbot i save kam insait long

solwara bilong Milen Be Provins na i hat tru long save watpo ol i kam insait long provins.

Mista Daduwe i bin kisim ol dispela plisman bilong Drag na Karim Skwata na tupela senia ditektiv bilong Sydney na ol i go askim ol pipel bilong ples long Is Kep na tu long Suau.

Plis long Papua Niugini na Australia i save pinis olsem ol dispela man hust i save salim ol spak brus na ol arapela kain hatpela marasin i laik yusim Papua Niugini olsem wanpela ples we ol i ken go na kam long en.

## Milen Be i laik gavman i sekap gut long ol selbot



● Dispela mep i soim rot dispela bot i bihainim.

**Harim gut! ol fama na pipel bilong wokim gaden!**

*"Em wanpela stua tasol bilong pipel i wok long graun"*

PIKININI FRUT  
PETALAI SA NA  
GRIS BILONG  
GRAUN

OL TULS

**BOSCH**

OL  
WARA PAM

**ongra**

SPET  
NA  
FOK

**TROJAN**

TRAKTA  
NA  
JENERETA

**Hitaura**

Agricultural  
supplies and  
equipment

**ASE**

P.O. Box 1121  
Telepon: 921470

**TROJAN**  
AUSTRALIA

**STAHLWILLE**

**DAVIES PUMPS**



# Kampani i baim kaukau long ol viles pipel

STIMSIP TREDING Kampani i helpim nau ol pipel bilong Popondetta, Noten Provins long baim moa long 15 kilo kaukau long wan wan wik.

Ol lokal fama insait long Noten Provins i gat gutpela rot bilong painim mani long dispela yia.

Ol bai salim kaukau i go long Stimsip long Mosbi, na dispela yia Stimsip i redi long baim moa long 70 ton kaukau long ol viles fama bilong Popondetta.

Bikpela bosman bilong lukautim frisa bilong Stimsip Kampani long Mosbbi, Mista Ken Houghton i tok olsem, "Mipela i tingting long bai samting olsem 78 ton kaukau long ol lokal fama long Noten Provins."

Em i tok, Stimsip Kampani long Mosbi i

save salim planti bilong ol dispela kaukau long Difens Fos na sampela long ol tret stua long siti.

Mista Hongton i tok, "Olgeta Fonde wanpela sata balus bilong mipela i save go long ol Hailans provins long baim ol kaikai long ol viles fama. Dispela program i stap bipo yet. Stimsip i laik helpim ol viles fama i painim rot bilong kisim mani."

Asisten Seketeri bilong Dipatmen bilong Praimeri Indastri, Mista Nathier Boraba i tok planti viles pipel husat i stap longwe long Popondetta taun i laikim dispela nupela sevis. Long wanem ol i save hatwok long painim rot long bringim kaukau na ol arapela kaikai i go long maket long Oro Be na Popondetta. Tasol nau, dispela nupela sevis i larim l long samai

long bikrot na salim kaikai i go long ol wokman bilong Maketing Divisen.

Mista Boraba i tok dispela nupela sevis i wok long kirap gut tru. Maketing Divisen bilong DPI bai go het long aim kaukau bilong pipel na salim i go long Stimsip Kampani long Mosbi. Na bihain bai ol i salim kaukau na arapela gaden kaikai i go long haus sik insait long Provins. Dispela sevis bai helpim ol lokal fama na helpim long givim gutpela kaikai long ol sik pipel insait long haus sik.

Em i tokaut olsem Noten Provins i gat inap saplai bilong gaden kaikai long salim insait long provins na tu long kain ples olsem Mosbi Dispela sevis bai helpim sindaun bilong pipel long rural eria na ol kastama. Na em i wanpela gutpela rot bilong kirapim wokmani bilong provins tu.



● Mista Wellington Belawa.

## Wes Nu Briten i gat nupela seketeri

DIPATMEN bilong Wes Nu Briten i gat nupela seketeri. Man ya em Mista Wellington Belawa. Em i bin kisim ples bilong olpela seketeri Mista Herman Talingapua.

Primia Bernard Vogae i bin tokaut long apoinment bilong Mista Belawa long wanpela spesel kibung ol i bin holim insait long provins.

Mista Vogae i bin tokim dispela kibung olsem tripela yia bilong Mista Talingapua i bin pinis nau.

Em i tok apoinment bilong Mista Belawa bilong kamap seketeri bilong dipatmen i bihain tasol rot em gavman na pablik sevis i save bihainim long makim ol het bilong dipatmen.

Nupela seketeri i tok olsem em i gat tupela bikpela tingting em bai wokim pastaim long stretim dipatmen bilong Wes Nu Briten. Wanpela em long traun na mekim strong ol wokmanmeri. Na long kamapim gutpela toktok na sindaun namel long nesanel na provinsal dipatmen

Mista Belawa i tok sapos ol i laikim strongpela na gutpela pablik sevis orait olgeta yet i mas wok bung wantaim na bihainim stret ol lo bilong Pablik Sevis Komisin.

## Enga i stap isi

OL PLISMAN long Enga i tok olsem i no bin gat moa pait i kamap namel long ol lain wanpisin insait long provins. Na ol plisman i wok long mekim gut wok bilong ol long holim ol trabelman na tu ol lain husat i bin ranawe long ol haus kalabus insait long kantri.

Plis Komisina, David Tasion i tok olsem ol 6-pela distrik bilong Enga i bin stap isi tasol bihain long Nu Yia. Em i tok i no bin gat trabel i bin kamap bikos ol plisman i bin sambai i stap long stapim wanem ol trabel i laik kamap.

Ol plisman i holim 4-pela moa pipel husat i bin ranawe long ol haus kalabus na sampela moa trabelman. Ol plisman i holim tu 4-pela pipel. Ol i sasim tupela bilong ol dispela man long stil na ol arapela tupela man em ol plisman i sasim tupela long indai bilong wanpela meri long mun Epril long las yia.

## Tupela opisa greduet

Roger na Bunty Penman bilong Blairgowrie long Viktoria, Australia i amamas long tupela kadet opisa bilong PNG husat i greduet long Ami Opisa Kadet Skul long Protsea.

Dispela poto i soim Mista na Misis Penman i sanap wantaim seken leptenen Ricky Tavaperry (lephan) bilong Mosbi na Sam Kauona bilong Not Solomons Provins. Ol tupela man ya i bin stap namel long 68 arapela opisa husat i bin greduet long Portsea.



## Madang na Lae i lus long lain

RING ... ring ... ring ... tasol Madang i no harim. Olsem wanem, ol wokman i no kamap long opis yet? Tasol taim em sampela minit i lusim pinis 10 klok long

moning long dispela Tunde 7 Januari.

Madang i no bin bekim. Em namba tri taim nau Wantok Niuspepa i ringim dispela opis long Madang na telepon i

wok long ring nating.

Ring ... ring ... Halo Lae?

"Yes, Lae PTC, olsem wanem?"

"Inap yupela pinimaut bilong wanem Madang telepon lain i blakaut?"

"Yes, Madang, Hagen na Goroka i blakaut bikos wanpela masin bilong kisim na salim toktok em mipela i putim long hap bilong Finschafen i bruk daun long asde nait (Mande

6 Januari)."

Em nau yu klia bilong wanem yu no inap long toktok wantaim ol wantok long Madang, Hagen na Goroka long Tunde 7 Januari bikos masin bilong PTC ol i kolim ripita sistem long Morobe i bin bagarap.

Dispela opisa bilong PTC long Lae i tok olsem ol wokman bilong fiksik kain samting olsem i go pinis long stretim

dispela bagarap. Tasol long Trinde 8, ol teknisen i stretim na Madang, Hagen na Goroka i no stap long tudak moa.

Dispela bagarap i bin katim tu sampela telepon lain insait long Mosbi na Lae na i mekim Tunde 7 Januari olsem namba wan de long 1986 we tudak bilong komyunikesen i karamapim sampela taun long PNG.

### i kam long pes 4

long dispela pasin bilong Plis. Em i tok olsem Plis i asua tru long subim nus i go insait long dispela trabel long Ramu Suga.

Minista bilong Leba na Emploimen Dipatmen, Mistas Bill Ninkama i salim tupela opisa bilong em i go long Ramu Suga eria long 2 Januari long dispela yia. Seketeri bilong dipatmen, Mis Rose Kekedo wantaim ekting deputi seketri, Mista John Elijah i go sindaun insait long

kibung namel long dispela wik Mande i kam inap Tunde moningtaim.

Dispela kibung long Mande na Tunde (6-7 Januari) i gat dispela tupela opisa bilong Leba Dipatmen, ol mausman bilong Ramu Suga kampani, ol lida bilong Ramu Suga yunian na Presiden bilong PNG Tred Yunian Kongres, Mista Henry Moses wantaim tupela opisa bilong em.

Dispela kibung i pasim tok long kirapim wanpela komiti bilong

painimaut asua. Na ol i wanbel long kampani i mekim dispela tripela rot i stap daunbilo:-

1. Kisim bek 13 wokmanmeri husat i wok haptaim long faktori,

2. Rausim wanpela PNG wokman husat i paitim wanpela kampani bosman,

3. Rausim wanpela wokman hust i pinis long wok na stap yet long eria bilong kampani.

Jeneral menesa bilong Ramu Suga, Mista Brian Awford i amamas tru long dis-

pela kibung i kamapim wanbel bilong sainim tok orait namel long yunian na kampani. Tasol Mis Kekedo wantaim Mista Henry Moses na John Elijah bai raitim kamap ol asua em komiti bilong painimaut asua i mas sekap long en. Dispela komiti bai gat mausman bilong kampani, yunian na Leba Dipatmen.

Dispela kibung bilong sainim tok orait i kamap stret long de bilong harim kot bilong Robert Nureo, Geoffrey Komino na Kelly Degemba.

## The Coffee Market

Sponsored by:



COFFEE INTERNATIONAL

PHONE 721322 | P.O.BOX 111  
TELEX 72663 | GOROKA  
FAX 722180 | PAPUA NEW GUINEA

### Wik stat long: 30-12-85

Pe bilong grin bin kopi long ol stua long Lae na long ol dua bilong faktori.

Dispela mak bilong pe i kam long ol kopi kampani. Ol mak bilong pe i bilong wanwan senta insait long PNG.

Gret	Mak bilong Pe
Y	K2.94 inap K3.70
X	K2.97 inap K3.80
A	K3.00 inap K3.90
Robusta	K0.00 inap K2.15


### Pe bilong old drai kopi bin long dua bilong faktori:

Kainantu	K1.65 - K1.70
Goroka	K1.78 - K2.00
Kundiawa	K0.00 - K1.90
Minj/Banz	K0.00 - K1.98
Maun Hagen	K1.78 - K1.90
Mendi	K0.00 - K1.39
Wapenamanda	K0.00 - K1.55
Lae Arabic	K0.00 - K1.85
Robusta	K0.00 - K1.55
Wewak Robusta	K0.00 - K1.00
Madang Arabic	K0.00 - K1.40
Robusta	K0.00 - K1.20



# TOYOTA HILUX

## I strong na smat moa



Long olgeta hap bilong Papua Niugini, Toyota Hilux i soim olsem em i wanpela strongpela na smatpela ka. I gat kain kain — ol 2WD, 4WD, singel keb, ekstra keb na dabol keb na ol i gat petrol o disel ensin. Kam na lukim mipela na test draivim wanpela Toyota Hilux nau.

**ELA MOTORS TOYOTA**

WHEELS FOR THE NATION

PORT MORESBY 21 7036 ● LAE 42 2322 ● RABAUL 92 1988 ● MADANG 82 2188 ● GOROKA 72 1844 ● MT. HAGEN 52 1888 ●  
WEWAK 86 2255 ● POPONDETTA 29 7240 ● KAVIENG 94 2132 ● KIETA 95 6083 ● KIMBE 93 5155 ● TABUBIL 58 9060

A MEMBER OF THE BURNS PHILP GROUP



# Sista Claire - mama bilong 24 pikinini

PLANTI mama husat i gat 5-pela pikinini bilong ol yet bai i no inap long lukautim 19 moa pikinini bilong ol arapela man. Tasol, Sista Claire Kadiesany, husat i matron bilong Cheshire Home long Mosbi i

ken ol dispela pikinini.

Cheshire Home i stap long Hohola long Mosbi we ol dispela tarangu pikinini, em lek, han na skin bilong ol i bagarap. Ol i no inap long wokabaut na toktok. Ol i sindaun long wilsia tasol.

## ISABELLE KAVO i raitim

Long 1986, Nu Yia Ona-Lista i kam long Kwin, Sista Clare i kisim namba ol i kolim Memba bilong Britis Empaia. I gat tupela arapela meri tu i kisin wankain namba.

Tupela ya em Ms Margaret Loko long sevis bilong em long helpim ol meri na yut. Na Misis Regina MacKenzie long wok bilong em wantaim ol meri.

Sista Claire i bilong Tari long Saten Hailans. Na em i tok, "Mi no ting olsem ol bikman bai luksave long wok mi mekim. Tasol, mi amamas nau ol i luksave, na em i gutpela tru."

Sista Claire i gat 30 krismas. Na em i marit na i gat 5-pela pikinini. Sista Claire i stat wok wantaim Dipatmen bilong Helt long 1971. Em i stat olsem trening nes na long 1975 em i graduet na kamap sista.

Ol lain Brata bilong Katolik Sios i bin lukautim dispela Cheshire Home na ol igivim fultaim skul na trening long Sista Claire olsem bihain bai em i ken lukautim Cheshire Home. Long 1981, Sista Claire i kamap Matron na em i kisim bikpela wok bilong lukautim ol tarangu pikinini.



● Sista Claire Kadiesany i sindaun wantaim sampela pikinini em i save lukautim long Cheshire Homes long Mosbi.



● Poto i soim sampela wokmeri bilong Cheshire Homes na ol dispela tarangu pikinini em ol meri<sup>na</sup> i save lukautim.

Matron Kadiesany i wok long tingim bek, long namba wan taim em i bosim dispela wok. Em i tok em i save wari nogut bai em i no inap long wok gut long taim ol Katolik Brata i lusim em.

Tasol ol wok i no bin bagarap na bihain long sampela yia em i sevis long dispela wok.

Cheshire Home i no save kisim bikpela helpim i kam long Gavman long ranim dispela ples. Sista Claire i tok i gat moa samting bilong stretim i stap. Na olpela

samting i bagarap. Na ol i laik sukruim Cheshire Home i kamap bikpela tasol i no gat inap mani long mekim dispela wok.

Ol samting ol i yusim nau i bilong bipo yet long 1965. Long dispela taim ol brata i kisim dispela wok long Sen Teres hospital i kam na sanapim Cheshire home.

Sista Claire i tok, sampela long ol pikinini i bin liklik tru na ol i stat long lukautim ol na nau ol i kamap bikpela manmeri pinis. Olsem na ol i painim hat long narapela ples i ken lukautim ol dispela lain.

Aninit long lo bilong Welfea Dipatmen, Cheshire Home i mas lukautim ol pikinini, em krismas bilong ol i stat long 18-pela yia na i go daun. Tasol sampela bilong ol i winim 18 krismas pinis. na sista Claire i pilim i no gutpela long rausim ol dispela lain long Cheshire Home bikos ol i no inap painim narapela ples long putim ol.

Welfea Sevis Dipatmen i save givim K3,000 long ranim Cheshire Home long olgeta 3-pela mun. Matron i tok, dispela mani i no inap nau long dispela taim bikos pe bilong ol samting long Papua Niugini i dia tumas. Olsem na sapos gavman i skruim dispela mak i go antap long K6,000 bai inap.

Sista Claire i tok

olsem dispela K3,000 i no inap long baim wara pawa na kaikai. Na i no inap tu long pe bilong ol 9-pela wokmanmeri wantaim ol arapela liklik samting tu.

Em i tok, Cheshire Home i wok long gohet gut yet bikos long ol gutpela manmeri, bisnis haus, ol grup, ol sios na gavman bilong arapela kantri husat i gat opis hia long PNG. Em i tok ol dispela lain i save helpim wok bilong Cheshire Home.

Emi tok sapos i no gat komyuniti sevis olsem bai Cheshire Home i no inap tru long ran gut. Em i tok, ol pipel i mas save olsem pasin bilong lukautim ol tarangu pikinini i hatwok tru. Sampela pipel i ken givap nating na les long kain wok olsem.

Em i tok, Gavman i mas tingting long ol disela pikinini na kain wok i stap long Cheshire Home na givim moa mani. Cheshire Home i lukautim 19-pela pikinini olgeta. Ol 10-pela long ol dispela pikinini nau i stap holide nabaut long krismas. Na ol dispela pikinini i stap yet em ol tarangu tru olsem i no inap long lusim Cheshire Home.

Matron Claire i save tok olsem Cheshire Home, em i haus bilong em tu. Bikos em i save ful taim tru long stap wok long hia. Na em i no gat tingting tru long lusim dispela ples.

## Ol sios klap i strong long Bougainvil

### Sophie Ramram i raitim

LONG KASTAM bilong Papua Niugini, meri i mas was long ol pikinini kukim kaikai bilong man na harim tok bilong em.

Tasol nau dispela pasin i no strong tumas moa.

Ol meri i go skul, kisim save na holim bikpela wok. Sampela i no kisim wok i stap long ples na kirapim sampela kain wimens klap long helpim ol meri bilong ples i save gut long wok bilong em olsem meri na sindaun bilong ples.

Insait long Bougainvil long Not Solomons Provins, i gat kain wok i kamap. Ol Katolik meri, husat i lusim skul pinis na i stap long ples i kirapim tingting bilong ol narapela meri na nau ol i wok long kirapim ol Katolik Wimens Klap long liklik ples bilong ol. Ol dispela klap i wok long kamap strong wantaim helpim bilong sista na strongpela tok gohet bilong Bisop Gregory Singkai.

Bougainvil Daiosis, i gat moa long 5-pela wimens klap. Ol dispela eria em: Buka,

Wain, Kieta, Nogovis/Siwai na Buin. Bikos i gat planti moa klap nau, ol meri i fomim pinis wanpela asosiesen ol kolim, Bougainvil Katolik wimens Aosisesen. Presiden bilong dispela asosiesen em Misis Anastasia LaPointe bilong Buka.

Long klap bilong ol meri, ol i save yusim planti taim bilong ol long mekim na lainim kain kain we bilong kamapim gutpela famili. Olsem na long spendim planti moa taim wantaim famili na sindaun gut wantaim long Krismas, Misis LaPointe wantaim eksekutiv bilong em i makim Disemba 15 olsem klosing de. Ol i pasim wok bilong ol long 1985 na sindaun isi long ples.

Long Tubiana Misin, long Kieta eria, ol wimens klap bilong Tubiana Peris i mekim namba 15 wanpela gutpela de tru.

Long dispela taim, insait long misa, ol meri i putim waitpela T' Shirt na bupela sket o laplap. Baksait long T' Shirt i gat print i tok, "Tubiana Peris, Ka-

tolik Wimen's Aosisesen." Insait long dispela print i gat piksa bilong Santu Maria i holim pikinini Jisas. Dispela piksa i wanpela mak. Maria i olsem wanpela gutpela piksa bilong ol meri.

Dispela taim Bisop Raymond Ceasar, bisop bilong Goroka i wokim lotu. Bipo long misa i stat, ol meri i singim wanpela song bilong Maria na wanpela meri i bilasim na putim plawa long het bilong Maria.

Advaisa bilong ol meri bilong Tubiana, Misis Bernadette Ropa i tok, "Santu Maria, long pasin na sindaun bilong em wantaim famili, i soim yumi ol meri long bihainim em olsem meri na mama."

Em i tok moa olsem sindaun bilong famili bai i no gutpela sapos man i no wok wantaim meri na meri i no wok wantaim man. Man i mas helpim meri na meri helpim man.

Bihain long dispela misa, ol meri i kamapim 21 kain kain pilai, danis na singsing long pinisim de bilong ol.



● Misis Anastasia LaPointe.

## Madang taun i givim K1,500 long ol komyuniti skul

NU YIA presen bilong Madang Taun Kaunsil i go long ol komyuniti skul insait long taun em K1,500 bilong wan wan skul.

Ol kaunsil bilong Madang Taun i bin makim dispela long 1986 baset bilong ol

long Novemba 1985.

Ol kaunsila i bilip olsem kain ol skul olsem Holi Spirit, Kusbau Jomba na ol arapela tripela komyuniti skul insait long taun bai singaut long mani long baim

ol samting bilong skul long taim ol isot long mani.

Namba tu taun manesa i tok olsem ol bai redi long sainim sekmani bilong wan wan skul insait long taun long taim ol i

kisim askim i kam long ol dispela skul.

Mista Raphael Saulmai, Provinsal Minista bilong Provinsal Afeas i putim mak bilong helpim mani long ol dispela skul long K1,500 long dispela yia 1986.



# Micah Wes - dokta boi i Helt Minista nau

NAGUM Seven De Adventis skul long Wewak, i no gat ples tru bilong husat hambak man o meri i laik statim straik, o stap wok.

Na ol i kikim aut Micah Wes, Minista bilong Helt nau long dispela skul long 1972.

Em i bin sutim bel bilong ol arapela studen long kamapim straik bikos ol studen i tok i no gat gutpela kaikai na stapim ol studen long go long baibel klas.

Ol sans bilong em long i go long Kabiufa Haikul long Goroka i bagarap olgeta bikos bikhet bilong em i mekim na ol i pinisim em long gret 6.

Bipo long Mista Wes i lusim Nagum i go bek long ples bilong em Ituly Bewani long Wes Sepik em i bin tokim ol poroman studen bilong em husat i bai go long haikul olsem, "bai mi bungim yupela sampela taim long sampela hap bilong PNG."

Dispela hap tok i kamap tru bikos Mista Wes i kamap memba bilong Palamen i bungim sampela bilong ol pinis. Em i memba bilong Vanimo/Grin Riva. Na nau em i gat moa sans tu long raun olsem Gavman Minista na bungim moa long ol dispela poroman, em i bin lusim ol bipo yet long Nagum.

Long taim Mista Wes i go bek long Ituly viles em i bin stap nating nau wantaim papamama bilong em. Em i helpim bikpela brata bilong em husat i bin tultul bilong ples na bihain i kamap dokta boi (APO). Papa bilong Mista Wes tu i bin tultul long taim bilong em na em tu i bin dokta boi.

Mista Wes i bihainim rot bilong papa na bikpela brata bilong em. em i save helpim brata bilong em long bewani helt senta. Na sampela taim em i save mekim ol liklik wok nabaut wantaim Bewani lokal gavman kaunsil.

Ol kain wok helpim olsem i givim save na strong long en. Na long ol dispela taim, em i gat bikpela bilip yet olsem sampela taim bihain tru bai em i kamap lida bilong

## PAULINE LAKI i raitim

ol Ituly pipel bilong em. Tasol, em i no bin ting olsem bai em i kamap politikman long Nesenel Palamen.

Bipo long em i sanap long jeneral ileksen long 1982 long Pangu tiket, Mista Wes i bin wok olsem Et Pos Odali ful taim nau. Tasol em i no go long skul long kisim save long mekim dispela wok. Em i lainim wok bilong et pos odali long taim em i stat wok na em i kisim moa save long dispela wok long taim em i wok. Ol i kolim dispela kain trening "On the job training."

Long 1974, Mista Wes i wok long Lumi na Aitape. Long taim ol kain sik olsem pekpek wara, i kamap Mista Wes i save kalap long gavman sata wantaim ol Wes Sepik medikal tim. Na tu em i save wokabaut long ol emejensi patrol olsem.

Long 1975, Bewani Lokal Gavman Kaunsil i holim ileksen long ol wok olsem Kaunsil Presiden, namba-tu kaunsila na ol Komiti nabaut. I gat ol bikman i stap pinis.

Mista Wes i yangpela tumas. Em i bin gat 22 krismas long dispela taim. Na kempain bilong em i lus nating. Ol lida long komyuniti i winim em.

Maski nau, Mista Wes i larim olgeta samting i stap isi liklik na em i wok olsem dokta boi yet. Orait ol i salim em i go stap long aut pesen long Vanimo haus sik.

Mista Wes i lus tu long 1981, Sandaun Provinsal Gavman ileksen long taim em i sanap long Bwani konstituensi. Ol dispela wokabaut bilong em wantaim Helt Patrol tim i winim lewa bilong ol pipel i stap long ol boda eria.

Mista Wes i tokaut olsem i tru em i mekim planti ileksen promis i go long ol pipel long taim em sanap long Pangu tiket. Bikos ol promis i bihainim polisi o platfrom bilong Pangu Pati.

Em i tok, "Mi tokim ol pipel olsem pe bilong kakau, kopra bai i go antap. Pe bilong ol samting long stua bai i go daun. Na yupela ol pipel bai kisim dinau isi long ol beng long kamapim bisnis."

"Tasol, bihain mi painim taim tru, na mi sori long ol pipel bilong mi long wanem mi giamanil olsem. Ol promis mi mekim i no kamap tru. Na long pasin tru insait long wok bisnis bilong kantri dispela i giaman tru mi mekim. Kantri i no wok olsem."

Em i tok singaut long stretim Vanimo Timba bisnis tasol gavman i no harim Mista Wes i sanap wantaim Pangu gavman yet, tasol ol singaut bilong em i lus nating. Na wankain tu long Vanimo Bewani rot.

Mista Wes i tok, "Dispela ol samting i mekim na mi krosim plua bilong Palamen i go long oposisen. Nau mi sanap independen memba tasol pro-Yunaitet, Pati."

Mista Wes i memba bilong Sandaun Independen Grup long Wes Sepik. Tasol long Nesenel Palamen, em i pro-Paul Torato Yunaitet Pati. Na em i tok "Mi givim ful sapot long Praim Minista, Paia Wingti."

Mista Wes i tok, long taim em lusim Pangu Gavman na i go

long Oposisen, i oraitim Vanimo timba bisnis long gohet "2-pela wik bihain long mi lusim gavman". Na Vanimo Grin riva rot. Nau ol i wok long ap-gretim. Olpela gavman i oraitim 2-pela mun samting i go pinis.

"Tasol, olpela gavman i laik grisim mi i go bek olsem bai vot bilong mi tu i ken helpim Somare Gavman i stap long pawa.

Mista Wes i tok arapela samting em i lukim i no stret long olpela gavman, em Mista Somare yet istap tasol ol advaisa na lain bilong em i wok long resis kisim moa pawa.

Em i tok dispela i nogut tru na em yet i no laikim nem bilong em i bagarap long ai bilong ol pipel long ilektret bilong em.

Mista Wes i tok ol trabel em ol bikman long Pangu banis i mekim bai ol liklik lain nupela memba olsem em yet i kisim nem nogut nating.

Mista Wes i tok em i no bin laik i stap long banis we ol man insait long dispela banis i pait kros namel long ol yet.

Mi namba wan man tru long lusim Pangu na go long oposisen. Tasol mi bin i stap independen memba olgeta taim."

Mista Wes i tok long 1987 bai em i tingting gut long wanem pati em bai sanap long en bihain long taim ileksen i kam klostu.

"Mi bai lukluk gut pastaim long ol polisi bilong ol kain kain pati pastaim."

Mista Wes i bin wangepela memba i singaut long stretim sindaun bilong ol

## Watpo mi lusim Pangu Pati


Etpos Odali, rot, transpot, pe na haus bilong ol. Na nau em i kisim sia tru olsem namba wan dokta boi insait long kantri (Helt Minista).

Em i tok, "Insait long dispela, 16 mun bai mi sindaun wantaim seketeri bilong mi na glasim gut. Mi tingting long kamapim wangepela trening senta we ol Etpos Odali na Nesing Aid i ken kisim trening wantaim insait long dispela 16 mun."

"Narapela eria em long skelim gut mani bilong malnutrisen progrem i go long ol eria o provins em kain sik i kamap bikpela tru.

Mista Wes i laikim pasin em Wingti Gavman i wok. Long ol hevi long boda eria wantaim ol refuji, Minista i tok, long Somare Gavman, Foren Afeas Minista i no save painimaut o askim long tingting bilong ol memba i kam long boda eria.

Tasol nau Foren Afeas Minista Mista Legu Vagi i save wok na toktok klostu wantaim ol memba bilong ol boda eria. Mista Wes i pilim dispela em i



● Mista Micah Wes - Minista bilong Helt i sindaun long opis bilong em.


gutpela we long wok bung gut olsem bipo long brukim nius nating i go long pablik o arapela kantri.

Na em politik. Olsem na sapos yu memba nating bai isi long singaut long sevis i kam long gavman. Na long komplek. Tasol long taim yu holim hap pawa bilong gavman minista i gat tupela tingting. Yu mas belisi na putim komplek na ol singaut i go long baksait.

Micah Wes, gret 6

dropaut, na man husat i bin brukim het nating wantaim K40 potnait olsem Etpos Odali, i sevis nau long ol trik bilong wok politik. Bihain long 13-pela yia em i minista bilong Gavman.

Ol Seven De Misin pipel long Nagum i mas amamas long em bikos ol i soim rot. Nau Micah Wes i gat 32 krismas. Em i no save smok na kaikai buai. Tasol em i bikhet yet long dring bia, wangepela tambu bilong ol Seven De.



● Mista Wes i toktok wantaim wangepela rises opisa bilong em Bill Toraso.

**WANT TO MAKE YOUR FOOD REALLY TASTY?**



Neks taim yu kukim rais, putim sampela Big Sister Curry Powder. I gat ol kain kain samting long en long mekim kaikai i swit moa yet.

**WOKIM KAIKAI BILONG YU SWIT MOA**

**ANOTHER RECKITT & COLMAN QUALITY PRODUCT**



## Mosbi Yut gat wok long 1986 tu!

NESENEL Kapital Distrik Interim Yut Emploimen Plen i bin givimaut moa long K16,250 i go long 83 yut grup insait long Mosbi long yia 1985.

Dispela yut emploimen plen i bin kamap long July 1 1985 bilong traime na helpim ol yut long givim ol sampela wok olsem kliam ol rabis o katim gras long siti.

Namba tu jeneral manesa bilong intarim komisin Mista Balakrishnadas i bin tok olsem dispela wok bilong komisin long traime na givim ol wok long ol yut insait long Mosbi i bin kamap gut tru.

Em i tok "Long dispela program mipela i save helpim ol pastaim long statim ol wok bilong ol, orait bihain mipela lusim ol long mekim ol wok bilong ol yet."

Nau i gat moa long 100 kain kain projek i kamap we ol yut i wok long mekim ol wok olsem klinim rabis arere long ol rot na long ol bare.

Long Hanuabada viles, long Mosbi yet, ol yut i bin fiksime simen rot bilong wokabaut na planti ol arapela projek.

Ol yut grup i save kam long ol setelmen na ol ples klostu na insait long Mosbi Siti. Na pastaim tru long ol i ken wok long wanem kain projek, ol i mas putim nem bilong ol Nesenel Kapitil Distrik Interim Komisin opisa, Frank Gewa husat i wanpela yut opisa.

Ol i mas gat wanpela pasbuk akaun i stap long beng aninit long nem bilong ol dispela wanwan yut grup. Orait bihain komisin i ken givim kain kain wok long dispela yut grup.

Planti taim Komisin i save traime long kamapim ol wok insait long ol komyuniti bilong ol yut yet. Dispela i bilong traime na kamapim gutpela sindaun namel long ol yut na olgeta manmeri husat i stap long dispela komyuniti.

Ol dispela yut grup i gat samting

olsem 20 manki long en, tasol long ol arapela i save gat samting olsem 60 inap 80 yut long wanpela grup.

Ol dispela grup i save wok aninit long ol supavisa husat i save kam long interim komisin.

Ol dispela grup i save kisim pe bilong ol bihain long taim ol i pinisim ol projek bilong ol.

Planti taim ol dispela grup husat i kisim wok insait long wanpela projek bai i no inap long kisim narapela wok inap olgeta arapela grup i pinisim projek bilong ol insait long dispela yut emploimen plen.

Pe bilong ol dispela projek i save stap aninit long K200 em Komisin i save givim sek tasol i go long ol grup orait bihain ol dispela grup i ken go na putim mani bilong ol long pasbuk bilong ol.

Tasol dispela program bilong yut emploimen i no pinis long 1985 bai Nesenel Kapital Distrik Interim Komisin bai i kaim yet dispela plen.

Mista Balakrishandas i bin tok olsem bikos dispela program bilong yut emploimen i bin ran gut insait long 6-pela mun em i tingting olsem bai i gat planti moa ol arapela kain projek bai i kamap.

Komisin tu bai i kamapim wanpela projek bilong mekim simen long Kaugere.

Long dispela yia tu NCDIC bai givim K100,000 bilong ol skul projek. Ol dispela fan i bilong mekim ol mentenens wok long ol skul insait long Mosbi.

Mista Balakrishnadas i tok olsem ol yut grup insait long Nesenel Kapital Distrik i bin wok gut tru.

Em i tok ol developmen i kamap nau insait long Mosbi olsem nambis na bikpela ples pilai bai ol i kirapim long Waigani bai inap long givim wok i go long ol yut grup.

# Yut I Ting Wanem?



**FRANK KARKURU** husat i gat 15 krismas na i bilong Galp Provins, i bin tok olsem gavman i bin mekim gutpela wok long 1985 na bin helpim ol yut grup.

**Stori bilong sampela yut em Wantok ripota Alfred Kamimba i bin bungim long dispela wik.**




**BRATA JOHN WAPALIN** husat i save lukautim Hohola Riman Senta (ples we ol i save lukautim ol liklik manki husat i save mekim trabel na wet kot) i bin tokaut olsem sapos ol gavman yut opisa i ken go wokabaut long rot na insait long ol setelmen na toktok wantaim ol yut bai ol inap long save olsem 1985 i yia bilong ol yut.


"Tasol ol i bin stap tasol long ol opis bilong ol na raitim pas tasol." Brata John i tok olsem yut opisa i no wok gut wantaim ol yut.

Em i tok planti ol yut i no stap insait long ol yut grup ol i save stap long ol rot na ol strit nabaut.

Nabaut Brata John i bin tok olsem insait long dispela yia, 1986, em laikim ol gavman yut opisa mas traime na go long ol setelmen na ol strit na mekim ol wok bilong ol.



**KASO** bilong Wabag i no save olsem 1985 i bin intenesenel yia bilong yut



**EMMANUEL JACK** bilong Popondetta, Oro Provins i tok, em i no bin hamamas long 1985 Intenesenel Yia bilong ol Yut bilong wanem em tok em i no bin lukim wanpela gavman selebresen bilong makim dispela yia.

Tasol em tok olsem em i no bin stap insait long wanpela yut grup insait long Mosbi.




**JOSEPH AISA** bilong Kairuku, Sentral Provins, husat i save stap long Hohola i tok olsem Gavman i no helpim ol yut. "Olgeta taim mipela save go askim ol sampela gavman dipatmen na ol kampani long painim wok tasol ol i save tok nogat wok. Olsem na mi ting olsem 1985 i no yia bilong ol yut tru".



**LIAM** i bilong Tapini, Sentral Provins tok em i no bin save wanem samting em Intenesenel Yia bilong ol yut.




**JAMES ROBERT** bilong Rossel Ailan long Milen Be Provins i tok olsem "long 1985 yia bilong yut ol gavman yut opisa i no bin helpim mipela. Planti taim mipela narapela taim long go bek gen na planti taim mipela go bek gen tasol ol i no bin givim helpim. Dispela kain pasin i no stet olsem na mi ting ol no helpim ol yut gut".



**STEVE RAVAI** bilong Tapini, Sentral Provins i tok olsem em i no bin save olsem i bin gat dispela kain Intenesenel Yia bilong ol Yut.

Em tok, "nogat wanpela opisa bilong yut i bin kam tokim mipela olsem 1985 em i wanem kain yia".

Tasol em tok olsem ol yut opisa mas traime na go aut na lukim ol yut husat i save stap long ol setelmen na tokim ol long dispela kain samting.



**GILBERT LAKA** husat i gat 20 krismas na i bilong Marshall Lagoon long Sentral Provins tokaut olsem gavman i no helpim ol yut gut. Long wanem, em tok gavman i bin helpim sampela yut grup tasol na i no bin helpim ol arapela grup insait long 1985 Intenesenel Yia bilong ol yut.

## Is Sepik skelim hevi bilong ol yut

WANPELA bikpela wok painimaut long ol wok bilong yut developmen na yut muvmen program insait long Is Sepik i bin stat pinis long mun Oktoba na nau i go het yet.

Is Sepik Provinsal Yut Kaunsil i mekim dispela wok painimaut bihain long wanpela eveluesen woksap yut kodineta long mun Disemba long 1984.

Wok bilong yut muvmen program insait long Is Sepik nau i wok long kamap

strong na i gro bikpela tru. I gat moa long 600 yut grup pinis i rejista long Is Sepik Provinsal Yut Kaunsil.

Tasol i no gat planti yut grup nau i wok long mekim ol yut projek insait long viles na taun. Planti yut grup i rejista tasol na i no longtaim ol i bruk nabaut na i no wok moa. Ol i les nabaut na lusim yut grup bilong ol na ranawe i go long taun o sampela ol i raun raun nating. Bikos i no

gat ol gutpela save long ranim wok. Na tu i no gat gavman dipatmen i save laik stap klostu na soim ol gutpela rot bilong wok bisnis, spot na ol arapela samting. Bihain long dispela wok painimaut bai Provinsal Yut Kaunsil i mekim wanpela sapmisen i go long Is Sepik Provinsal Gavman long wanem ol hevi tru i stap nau long wok bilong yut muvmen program insait long provins.

## Saina Yut



● Ol opisa bilong "Saina Yut Federeesen". Husat i bin kam mekim 3-pela wik raun insait long Papua Niugini i long Oktoba 1985.  
● Dispela man husat i putim han i go antap em i Presiden bilong olgeta yut insait long Saina....

**"Westap takis kliarens setifiket bilong yu?"**

Olsem wanem! PMV bilong yu i no ran gut moa? Yu save baim bikpela takis tumas tu?

Coopers & Lybrand bai helpim yu long stretim ol dispela takis na soim yu long rot bilong baim liklik takis tasol. Lukim Coopers & Lybrand nau tasol na putim PMV bilong yu long stretpela rot gen.

OFFICE	25 8644	Lae	42 2644
Baroko	21 1500	Madang	82 2262/82 2571/82 2680
Port Moresby	95 1355	Mendi	59 1111
Arava	72 1177	Mount Hagen	52 1092/52 1064
Goaroka		Ratuni	82 3242
		Wewak	86 2692/86 2577

**1985. Piksa stori**

BIKMAN MI PAINIM WOK YA?

MINISTA FO YUT

YU LUKIM NOTIS LONG DUA TU O?

NA OL I TOK 1985 OLGETA YUT BAI KISIM WOK YA?

**Johnson LEADS THE WORLD**

**YU KEN BAIM WOL'S NAMBAWAN AUTBOD.**

LONG NAMBAWAN EDVAIS O TOKSAVE KAM LUKIM OL SAVEMAN LONG STEAMSHIP MICHINERY

**Steamships - MACHINERY**

PORT MORESBY	LAE	MADANG	RABAUL	KIETA
259066	43 1253	82 3021	90 1290	95 6246





COLLEGE OF EXTERNAL STUDIES

# Going Places

High School at home - COES helps

you with your studies **No 176**



COLLEGE OF EXTERNAL STUDIES

## Our neighbours — Guam

### GEOGRAPHY

Guam is the largest island of the Mariana Islands group. It is 541sq km in area and about 2400km north of Papua New Guinea. It is about half the size of Buka Island.

The northern part of Guam is a limestone plateau 150m above sea level. In this area the water sinks through limestone, so there are no rivers.

The southern part of Guam is covered in volcanic mountains. The highest point is Mt Lamlam, 407m. The southern part of Guam has many rivers and waterfalls.

The capital of Guam is Agana, the main port.

### Population

There are about 120,000 living in Guam. Over 21,000 are members of the United States armed forces and their families. About 60 per cent of Guamanians are called Chamorros. The Chamorros speak a Micronesian language that has many Spanish and other European words in it. The Chamorros are a mixed race people of Micronesian, Spanish and Mexican-Indian blood. Twenty-two per cent of Guamanians are of Filipino origin. The rest come from Asia, America and the Pacific. English is the official language.

Guamanians have many Spanish customs. American influence is also very strong. The way of life is similar to that of the USA and the Philippines.

### Climate

Guam has a tropical climate similar to Wewak. Temperatures range between 21°C and 32°C. The wet season is between September and November. Annual rainfall is about 2000mm. From November until June cool easterly trade winds give Guam a pleasant climate. Strong winds called typhoons occur in August and September.

### History

Guam has been inhabited for more than 3000 years. When Europeans arrived in 1521, there were already 70,000 Micronesians living on Guam. The Spanish, a European people, began colonising the Mariana Islands in 1565. In 1665 Catholic missionaries landed and a Spanish governor arrived with Filipino and Spanish soldiers. The people rose against Spanish rule. After 25 years of bitter fighting only about 5000 people, mostly women and children, remained alive. Many died from European-introduced diseases.

In 1898 Guam became an American territory. In 1941 Guam was captured by the Japanese. Nearly three years passed before the Americans returned to defeat the Japanese. Until 1970 the island was ruled by an American military governor, appointed by the American government in Washington. In 1970 Guamanians elected a civilian governor for the first time. The present governor is a Guamanian named Ricardo J Bordall.

### Constitution

The Organic Act of 1950 made Guam an "unincorporated territory of the USA." This means Guamanians are American citizens who can only vote in elections in Guam. They can't vote in American national elections.

Guam has a Legislative Assembly with 21 members. The Legislature Assembly has powers like a provincial government in Papua New Guinea. Elections are held every two years.

The governor holds executive authority for Guam's local affairs. Elections for governor are held every four years.

### Economy

People keep pigs, cattle and poultry, and grow fruit and vegetables. Guamanians are trying to become self-sufficient in fruit and vegetables by using HYDROPONIC



methods. In this system, plants are grown in a chemical mixture with water, so soil is not needed. Agriculture often suffers from typhoons.

Guam gets its income from tourism and the U.S. forces. Over 300,000 tourists visit the island every year, mostly from Japan. The U.S. forces employ many Guamanians. Guam imports far more goods than it exports.

### Religion

About 93 per cent of Guamanians are Catholic. There are also over 17 other Christian denominations in Guam as well as Jewish and Bahai communities.

### Education

Children must go to school from the age of six until they are at least 16. Education is well organised. There are government and private schools as well as a trade and technical school and a school for the handicapped. The University of Guam has over 4000 students.

### Transport

There are 674km of sealed roads. Most people use taxis. Buses only operate at the beginning and end of the working day. Guam International Airport is owned by the U.S. Navy. International airlines link Guam with the United States, Japan, the Philippines and mainland Asia. Passenger and cargo ships link Guam to other Pacific islands, Hongkong, Taiwan, South Korea and Japan.

### The Media

There are three radios to every person and two televisions to every three people in Guam. There are four radio stations, two television stations (one for educational programmes) and a cable television network. The Pacific Daily News is Guam's largest newspaper, with a circulation of over 18,000.






*Chamorro houses before the European arrival*



*Remains of stone pillars from the old Chamorro houses*

# Guam



*A waterfall in south Guam.*



*Micronesians before the Spanish arrived.*



## Finchhafen Provins?

Dia Edita — Yes mi save ritim *Wantok Niuspepa* na lukim planti manmeri i tok olsem Finschhafen i mas kamap provins bilong em yet.

Long Oktoba 24, mi lukim long *Wantok Niuspepa*, brata Yagasu Bongo i tok olsem bikpela haiwara i bin bagarapim ol sarating long *Magazezu Viles* long Pindiu Patrol Pos.

Ol pipel i askim Morobe Provinsal Gavman long helpim ol tasol provinsal gavman i no harim ol. Olsem na mipela long Finschhafen i ting mipela i nogat provinsal gavman.

Long sampela provins, sapos ol man i bagarapim na oli askim provinsal gavman bilong ol long helpim ol, wantu tasol bai gavman i helpim ol.

Mipela i no amamas na mipela laik olsem bai mipela i kamap provins bilong mipela yet. Sapos mipela i kamap provins bai mipela i ken lukautim mipela yet gut.

Na tu mipela i no amamas long baset bilong provinsal gavman. Long olgeta yia mipela i save lukim nesenel Gavman i givim baset bilong Morobe, tasol mipela i no save lukim wok i kamap long dispela mani. Ating ol membai save subim i go insait long poket bilong ol.

Na nau mi laik askim ol provinsal memba long opim ai bilong ol na lukluk long wari bilong husat ol man i bin votim ol. Tingting gut na wok stret, maski slip tumas.

Sapos yu husat brata o susa i lukim dispela pas na i laik sapotim o egensim rait tasol long *Wantok Niuspepa* na bai mi lukim.

**Emong Kiowiring, Bonganko Viles, Pindiu, Finschhafen.**

# Ol hailans lida mas helpim hailans man

Dia Edita — Mi sapotim tripela palamen lida bilong Hailans, em Mista Paias Wingti, Iambakey Okuk na Paul Torato. Mi gat bilip long ol i gat strongpela tingting long helpim 5-pela provins bilong Hailans.

Hailans eria i gat 5-pela provins na bikpela namba bilong pipel i winim ol narapela provins. Na em i

gutpela tru long wanpela bilong dispela tripela lida i kamap praim minista. Long wanem mipela ol pipel na lida bilong hailans i olsem ol manki husat i stap namel long kain kain pati bilong nambisman.

I luk olsem i no gat gutpela wok developmen i kamap long dispela 5-pela hailans provins. Tasol mi no laikim mipela i

komplen long basetmani bilong dispela nupela yia, 1986. Long wanem lida bilong hailans i no holim wok praim minista long taim bilong putim kamap dispela basetmani.

Nau mipela tokaut olsem yumi ol hailans pipel i no ken belhat. Yumi mas sindaun isi na lukluk long nesenel ileksen bilong neks yia, 1987. Na yumi mas

tingting strong long helpim dispela tripela palamen lida nau i go inap long 1987.

Mi laikim yupela i tingim dispela tripela lida long beten bilong yupela long God. Long wanem God i save makim gutpela lida husat i save long ranim kantri. Na em i plen bilong God.

God bai makim wanpela bilong dispela tripela lida long kain

wok ol i mekim. Olsem mi laikim yupela ol pipel bilong Hailans i sapotim tingting bilong mi. Sapos yu stap long wan wan hap bilong PNG, yu mas sapotim mi long dispela tingting bilong nesenel ileksen na wok Praim Minista i go long wanpela Hailans lida long 1987.

**Tairen Asiki, Madang Provins.**

## Apim BCL fotnait pe

Dia Edita — Mipela 4-pela man bilong Enga Provins husat i wok long Bougainville kopa main long Not Solomons Provins nau.

Mipela i gat bikpela wari. Long wanem, dispela kampani, BCL, i save baim mipela long K70 o K80 long potnait.

Dispela mani i no inap tru long helpim mipela wantaim meri na ol pikinini long wan wan famili.

Mani save sot kwiktai na mipela i save sot long mani long lukautim famili na wokabaut bilong mipela.

Gavman i apim pe bilong balus i go antap. Prais bilong olgeta samting i sut i go antap tru nau. Mipela i tingting long bringim famili i go long asples na kam bek long ples bilong wok. Tasol mani bilong mipela i sot.

Mipela i askim BCL long apim fotnait pe bilong mipela ol wokman i go antap. Mipela i askim gavman tu long daunim pe bilong baim balus. Ol dispela samting i mekim mipela ol grasrut wokman na famili bilong mipela i belhat tru. Long wanem yupela ol bikman long gavman na kampani i no tingim mipela ol grusrut wokman.

Mipela ol man bilong Mulitaka eria bilong Lagaip Distrik long Enga Provins.

Mipela i painim hat tru long salim famili i go long asples. Mipela yet i no gat we long kisim balus o sip na go bek long asples. Olsem na bai mipela i stap olgeta long Not Solomons Provins.

**Isop Kouku, Lus Wasata, BCL, Panguna, NSP.**

## No ken jeles long skin makmak

Dia Edita — Mi laik bekim pas bilong Tommy na Misis Kenaia Sivu i kamap long *Wantok Niuspepa* long tupela wik bipo. Het tok long komplek bilong ol i go olsem - No ken soim skin.

Yes tupela, ating yutupela wari tru long lukim pes makmak, a? Olsem na yutupela i toktok. Em i no samting bilong yutupela.

Harim gut. Em i wanpela kastam bilong Papua Niugini. Dispela pasin bilong putim mak long pes na bodi em i pasin tumbuna planti hap bilong dispela kantri.

Long sampela bilong yupela, em skin bilong yupela i blak nogut tru olsem sit biong paia. Em i hat tru long yupela i putim mak long skin bilong yupela. Ating yupela i jeles long dispela stail bilong lain pipel husat i gat skin i no bilak.

Ol manmeri i gat mak long skin i luk smat tru. Ol i putim kain kain mak long skin o pes. Ating yupela i gat belhevi long ol manmeri i gat mak na i raitim dispela pas o olsem wanem?

Sori tumas, traim gen. yutupela i no gat gutpela toktok long putim kamap long *Niuspepa* na raitim kamap dispela liklik giaman tok. Yutupela i no inap stapim dispela kastam. Ol meri i gat mak long bodi i bihainim pasin bilong tumbuna long bipo i kam inap nau.

Stap isi tasol na lukluk long ol manmeri i gat mak i go i kam long pes bilong yutupela. I no gat gutpela as long yutupela i putim kamap dispela wari. Yutupela i no gat rait long stapim dispela kastam. Wari bilong yutupela bai popaia stret.

Lukim skin bilong yutupela. Em i bilak nogut tru. Sapos yutupela i putim mak long en, em bai kamap klia olsem wanem?

**Shyne T.Ragi, Bainyik Vokesenel Senta, Maprik, ESP.**

## Meri trikim man long marit

Dia Edita — Mi save lukim planti bilong mipela man bilong hailans i maritim meri bilong arapela provins o tokples. Em i gutpela rot. Tasol mi save lukim pes bilong ol meri na mi save sem na pret. Long wanem planti bilong ol dispela meri i lapun tru.

Ol lain bilong meri i save grisim hailans man long maritim meri. Sampela taim oli pusim meri long maritim hailans man. Long wanem, oli gat tingting long mekim dispela hailans man i wok i stap long ples bilong meri tasol. Na planti man i save pundaun long dispela trik.

Mi bilip olsem planti hailans i amamas tru lon gmaritim meri long arapela provins long nambis o ailan provins. Maski meri i lapun o gat planti pikinini pinis, em bai dispela hailans man i kisim tasol. Long wanem em i lus tru long meri ya.

Mi laik tokim ol dispela kain hailans man olsem yupela i maritim ol meri i gat wankain krismas long lapun mama bilong yu. Na yu no sem long dispela samting. Sampela bilong yupela i mekim dispela pasin na givim bikpela sem long mipela arapela lain man.

Mi ken tok olsem yupela ol dispela kain man i longlong tru. Yupela i no save long wanem samting i kamap long raun bilong yu husat i gat narapela man pinis. Planti hailans man husat i stap long dispela rot i pulap long olgeta provins na taun.

Ol lain long asples bilong meri i laik holimpasim yu. Long wanem ol i laikim yu wok long plantesin blok na helpim ol long bisnis bilong ol yet. Oli no inap givim yu bikpela pe long potnait. Tasol yu no inap

komplen na ranawe. Long wanem ol i givim meri long yu pinis na bai yu tingting long helpim ol tambu tasol ya, laka?

Mi laik tok olsem yupela ol dispela hailans man i gat asples na graun bilong yu long hailans i stap. I gat ol meri bilong yu ken maritim long asples yet. Tasol yu yet i giaman long wok kontrak na amamas tasol long maritim nambismeri.

Plis, ol wantok, tingting gut pastaim na go painim wok long arapela longwe ples.

Sapos yu no gat gutpela sindaun long dispela longwe ples, yu mas kam bek long asples na maritim.

**Kete Pondopa, Kira Viles, Kagua, SHP.**

## Wok leba i stap yet

Dia Edita — Mi wanpela man bilong Mendi na mi bin wok inap 17 yia olgeta long Woks na Saplai long Popondetta.

Long dispela taim mi no bin lukim wanpela samting i senis.

Olgeta man mipela i wok wantaim i go kisim gutpela posisen long Pablik Sevis na mipela sampela i stap olsem leba yet.

Sapos i gat minista bilong Woks na Saplai

em i mas lukluk na stretim wari bilong ol man i stap aninit long pablik sevis.

**M. Karia Warea, Woks na Saplai, Popondetta, Oro provins.**

**Tok Save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu.**

## Mi no amamas long baset bilong Morobe Provinsal Gavman

Dia Edita — mi no amamas long baset bilong Utula Samana long 1986.

Mi sapotim olupela memba bilong Kabwum long Nesenel Palamen Mista Buaki Singeri long tok olsem Samana wantaim gavman bilong em i save lukluk long Aseki, Menyamy, Wantoat, Wau na Bulolo long Saut morobe tasol.

Ating Samana mas senisim nem bilong provins i go long Saut Morobe na i no Morobe provins.

Mipela ol pipel bilong Kabwum na Finsch i no moa amamas long primia bilong Saut Morobe.

Lukim Rural improvmen Progremlong Deyamos Komyuniti gavman, em i nogat tru. Na dispela arapela

tupela wara saplai projek long Longmon na Leiwamo em i rabis stret.

Plis yupela ol memba bilong Kabwum na Finsch, yupela i nogat ai tru. Bilong wanem yupela i save sapotim Samana? Yu dispela kain lida, mipela ol pipel bai i no inap bilipim yu. Lida bilong Saut Morobe (Samana) i save maus-

wara long yu na yu save pilim swit. Tasol pasin bilong marimari i nogat tru. Pasin bilong wantok sistem tasol i stap. Sapos yu lida tru orait yu mas opim tupela ai bilong yu na maski long putim Saut Morobe long hansut na mipela long hankais. Em tasol, tenkyu.

**Foekac Katur, Kavwum Distrik, Morobe provins.**



## Meri no gat strong

Dia Edita — Dispela em namba wan taim bilong mi long rait i kam long Wantok Niuspepa. Mi laik sapotim pas bilong sista ya Angelyne Patsie Kundi.

Long pas bilong em i bin kamap long Wantok namba 599. I tru long lukluk bilong mi nau planti man i pinis skul olsem gret 10 gret 8 gret 6 na nau planti bilong ol i wokim raskol pasin, na i luk

olsem raskol i wok long kamap bikpela tru, long olgeta bikpela taun.

Orait bilong wanem na gavman i laik kisim ol meri long kamap ol soldia. Sapos nau pait kamap namel long Papua Niugini na narapela kantri na sapos gavman i salim ol meri i go long pait yu ting bai ol i winim pait?

Long tingting bilong mi ting olsem bai ol i pret long wanem ol i no

gat strong.

Ol man i pinis skul olsem gret 10 na ol arapela skul liva gavman i no laik tingting long kisim ol man long joinim Difens Fos.

Ol man i gat strong na i no save pret. Gavman mas tingting gut na no ken kisim ol meri long kamap soldia.

**Thomas Menui, Kimbe, WNPB.**

## Nem Sepik i bagarap long Not Solomons

Dia Edita — Mi wanpela man bilong Vanimo, West Sepik. Liklik ples bilong i em Kamnom. Nau mi stap long Not Solomons Provins.

Mi lukim dispela ol

manki planti em ol yangpela man no gat wok bilong Marpiik, ol Wosera i save kisim sip kapsait i kam long Not Solomons. Ol painim wok nogat.

Em nau ol i raun

nating na i save brukim ol stua i go insait long stilim ol bilas kaikai na mani nabaut tu. Dispela i bagarapim tru nem bilong yumi ol Sepik bilong Is na Wes wantaim.

Planti long ol mi bungim i save tokim mi olsem, ol i harim stori olsem Buka i gat bikpela gol i stap. Na planti wok gol i stap long Panguna. Olsem na harim stori tasol ol save seksek kisim sip tasol na kalap.

Taim ol kamap hia. Ol i painim taim stret. Driman na amamas

bilong ol i go popai. Nau ol nogat kaikai n mani bilong sindau long en nau. Na ol save brukim ol stua. Na kamapim stilman trabelman nabaut.

Nem bilong Sepik go daun tru long hia. no Hailans o Tola tasol. Sepik tu ol kai olsem i save kamapin hevi na birua na o gutpela wokmanmer Sepik long kampani i gavman i save pilin sem long nem nogu olsem.

Not Solomons Provinsal Gavman mas rausim ol kain driiman olsem i go bek long ples. Na yupela long asples long Sepik i no ken sutim bel bilong skul liva olsem i gat gutpela laip long taun. Mekim bai ol i longlong i go long taun. Na taim laip bilong ol i go nogut olgeta long trabel, birua na hangre wokabaut.

**Sony Token, Toniva, NSP.**

## Tisa wansait long wanples studen

Dia Edita — Mi gat wanpela liklik wari long autim long ol tisa na hetmasta bilong Komyuniti Skul.

Long las de bilong pasin skul long Kris-mas holide, ol tisa i kolimaut nem bilong ol gret 6 studen husat bai go long haikul long

narapela yia.

Planti manki bilong arapela provins i studen long arapela provins skul. Maski ol i kisim gutpela mak long olgeta skul stadi, em bai ol i no gat sans long tisa i makim ol. Long wanem, sampela tisa i wansait long ol studen

bilong asples yet. Dispela pasini no stret.

Mi laik tok olsem yupela ol dispela tisa i mekim dispela kain pasin i mas pinis long er. Yupela i mas tusait na makim studen inap long kain mak na hatwok ol i mekim insait long skul. Ol

dispela studen i no bilong narapela kantri. Yupela ol tisa i mas stapim dispela rabis tingting na i stap tusait long taim bilong makim ol studen long go long haikul.

Mi wanpela manki Finshafen bilong Morobe Provins. Na

mi stap wantaim papamama long Panguna Kopa Maining eria. Mi makim maus bilong planti poroman bilong arapela provins na autim dispela wari.

**Jeffrey Sombe, Kieta, NSP.**

## Mista Bais no tingim trabel

Dia Edita — Mi no bin amamas tru long sampela toktok em Mista Tony Bais i bin mekim long taim em i bekim toktok bilong Madang Seimba ov Komes long kisim helpim mani i kam long Australia long stapim ol raskol pasin i wok long kamap insait long Madang taun.

Yes Mista Bais yu bin toktok bai gavman i no mas kisim mani i kam long Australia long daunim dispela raskol pasim i wok long kamap na tu ya bin tok olsem yumi i no stap

moa aninit long ol waitman.

Orait harim long bekim dispela ol toktok bilong yu mi ken tokim yu stret olsem yu dispela man yu no gat tingting stret long stapim dispela ol trabel bikos tingting bilong yu i soim klia tru olsem yu no wari ol raskol husat i wok long bagarapim Madang taun.

Sapos mi olsem yu, wanpela hetman bilong dipatmen long gavman mi no inap long tok no gat long toktok bilong ol lain Madang Seimba ov Komes. Mi mas sapotim tru toktok bilong ol na askim long moa mani bilong stapim trabel.

**S. Sullivan Taun, Dissident Rabaul.**

## Siassi bilong Wes Nu Briten?

Dia Edita — Mi wanpela manki bilong Siassi Ailan na mi bin kisim sip long Lae na mi laik kam long Kimbe. Mi kam stret long ailan bilong mi na mi lukluk i go bek long Morobe Provins na lukluk i kam long Wes Nu Briten na mi lukim olsem Siassi Ailan i klostu tru long poin bilong Wes Nu Briten na Morobe Provins i longwe tru long Siassi.

Olsem na mi ting mobeta Morobe Provins i mas lusim mipela ol Siassi na mipela i kam aninit long lukaut bilong Wes Nu Briten.

Tu Morobe provins em i wanpela bikpela provins tru insait long kantri. Yes mipela ol Siassi i no save kisim planti helpim tumas long wanem i gat planti sab distrik tru insait

long Morobe provins olsem na provinsal gavman i no tingting tumas long Siassi.

Narapela samting tu mi bin harim planti tingting bilong ol wantok bilong mi planti sapot tru long baim mipela ol Siassi i kam aninit long lukaut bilong Wes Nu Briten.

Mi ting olsem sapos Wes New Britain i lukautim mipela ol Siassi ating bai mipela i kisim planti helpim na bin mipela i sindaun gut tasol. Mi ting olsem sapos ol bikpela Siassi i no laikim dispela kain tingting bilong mi orait ol i ken i go joinim Morobe na mipela i ken stap amamas tasol.

**Edwin Wang, Kimbe taun, WNPB.**

## "Sound of Sepiks"

Dia Edita — Plis prinim dispela pas bilong mi long Wantok. Olsem bai ol pipel bilong Wosera long Maprik, Is Sepik i wok nau i stap long Lorengau, Manus i ken harim.

Ol dispela bilong Wosera i gat wanpela stringben ol kolim S.O.S. Dispela i main "Sound of Sepiks."

Plis yupela ol Wosera Sepik long Manus, senisim dispela na kolim yupela yet "Saund of Wosera." S.O.W.

Mi kirap nogut long harim ol bikman i ranim 10 Independens selebresen i singautim dispela stringben SOS, "Saund ov Sepik," bilong ol long pilai antap long konset, long grensten.

Na taim ol pilai mi sanap harim i stap. Man i kra i narakain stret. Nek bilong ol i tanim narakain tu. Mi yet i tok, o maski nau givap. Bikos planti ol manmeri i bung tu i lap nogut tru. Man bikpela sem stret.

Mi laik ol (Mino ... o Muno) lain Wosera i stap long Manus i senisim nem i go S.O.W. Na mi tokim yupela tu. Wosera i no Sepik tru. Em ol bus pipel long Sepik Wosera i stap long kunai bus namel i go long Sepik wara na Maprik. Na ol i no tru Sepik olsem ol tru wara Sepik pipel.

Ol Wosera i no save pul long kanu na i no save swim long wara tu. Maski givap no ken tok "Sound ov Sepik." Bikos yupela i no tru wara Sepik pipel. Yupela kolim stringben bilong yupela Sound of Wosera. Nogat orait... "Kunai Bus Stringben" bai kamap stret.

**Apri Jukrewa, P.S. Gitaris, Manus Ailan.**

## Gavman mas baim ol pasindia sip

Dia Edita — Mi gat wari liklik olsem na mi rait i kam long Wantok.

Yes wari mi i gat em long pe bilong balus insait long Papua Niugini i wok long go antap.

Olsem wanem na Papua Niugini gavman i no save sori long ol manmeri bilong PNG tu o nogat? Planti ol pipel i stap long PNG na sampela i gat wok na sampela i no gat wok na ol save stap nating.

Tu long ol marit i gat planti pikinini i stap insait long ol taun. Olsem wanem sapos ol laik i go long ol provins ol asples bilong ol na ol i sot long baim balus i

go long wanem hap provins bilong ol na pe bilong balus i antap tumas na bai ol olsem wanem?

Ating gavman bilong PNG mas tingting pastaim na apim pe bilong balus em mas sori olsem em i hat long ol PNG man meri long painim inap mani bilong baim balus i go long ol ples bilong ol.

Tu mi gat wari em olsem sapos gavman i apim pe bilong balus i go antap tumas orait em mas wokim sampela rot long baim pasindia sip inap long helpim ol manmeri bilong PNG long go long ol provins bilong

ol. Dispela i bikos pe bilong sip i stap daun-bilo liklik.

Olsem na tingting bilong mi olsem, mi laikim gavman mas baim ol pasindia sip long helpim ol manmeri bilong PNG long go bek long ol provins bilong ol.

**Kemson Hindiong, Buin Earth Moving, NSP.**

**Salim pas i kam long: WANTOK NIUSPEPA PO BOX 1982 BOROKO NCD**

## Wantok sistem long viles kot

Dia Edita — Mi wanpela katekis bilong lotu Katolik insait long Banjis Peris long Westen Hailans. Na mi laik autim liklik wari bilong mi. Mi no save amamas liklik long ol viles kot i save kamap long hap bilong Not Wagi eria long Banjis.

Mi save lukim ol wokman bilong viles kot, olsem mejistret, pis opisa na ol kuskus i no save wok stret. Mi save painim ol dispela kain pasin i stap wantaim ol.

Pasin bilong spak na pait. Ol i save pilai kas, bingo na dat bot. I save sutim bel na kirapim toktok bilong statim pait. Ol i save haitim o karamapim ol toktok, taim kot bilong wantok bilong ol i kamap.

Dispela pasin na tumas wantok sistem i pulap tru.

Dispela ol pasin i stap strong tru long sampela bilong wokman bilong viles kot. Tasol mi ting dispela pasin em i nogut tru.

Narapela samting, sapos wanpela man (papa) i save stail ol taim. Na em i tokim pikinini bilong em long i no ken mekim stil pasin, yu ting pikinini inap long bilip na harim toktok bilong papa tu? Ating nogat tru ya.

Ol sampela wokman bilong viles kot i wankain olsem. Ol i sakim na brukim lo bilong gavman. Na ol i tokim mipela ol arapela long viles long bihainim lo bilong gavman.

Bai mipela i bihainim olsem wanem. Taim mipela i lukim long ai bilong mipela, ol mejistret, pis opisa na viles konstabel nabaut i mekim ol kranki pasin na i brukim lo bilong gavman.

Ol yet mas sanap namba wan man bilong bihainim lo, na soim gutpela pasin o piksa long ol viles manmeri long bihainim gutpela sindaun bilong ol.

Ol kain pasin nabaut i mekim mi gat strongpela bilip pinis olsem kantri bilong yumi Papua Niugini bai gat dispela ol kain pasin i stap oltaim, oltaim yet.

Olsem na ol provinsal gavman, opisa, plis o kot sistem olsem Jastis Depatman mas glasim gut ol viles sistem i ran olsem wanem.

Sapos kranki wok i kamap rausim olpela lain na putim nupela i go insait long viles kot wok.

**Robert Nanz, Katolik Misin Ambang, Banz, WHP.**



# LOOK OUT for these NEW LOOK NISSANS!



#### POWER PLUS ECONOMY

- Extra power from new 2-series engine
- Better acceleration better starting
- Superior fuel efficiency and range
- Improved engine cooling

#### TOUGHNESS

- Oversize all-metal bumper
- Higher road clearance and clean under-chassis for better rough road driving

#### COMFORT

- Roomy quiet cab interior
- Super-comfortable adjustable bench seating
- Efficient air conditioning
- Extra wide opening doors

#### SAFETY

- Improved visibility
- Extra size rear view mirrors
- Easy to read instruments
- Large sun-visor
- Large windshield wipers

#### STRENGTH

- Re-designed super frame for improved load carrying
- One-piece side panels and double-walled tailgate
- Tougher body resists rust and corrosion

#### PAYLOADS

- Longer wider and deeper load beds
- Double strength flat surface tailgate
- Longer wheelbase wider track

**NISSAN PICKUP Long Bed**  
**NISSAN PICKUP Double Cab**  
**NISSAN PICKUP King Cab**

**NISSAN PICKUP 4x4 Long Bed**  
**NISSAN PICKUP 4x4 Double Cab**  
**NISSAN PICKUP 4x4 King Cab**

**NEW NISSAN PICKUPS**  
the tough customers  
with the soft touch!

*Look in and see the good guys!*




**BOROKO**  
**MOTORS**



BOROKO MOTORS Port Moresby—25 5255 ● Lae—42 1144 ● Rabaul—92 2777 ● Madang—82 2433 ● Mt. Hagen—52 1433 ● AGENTS AT Arawa Motors  
Arawa—95 1566 ● Higaturu Motors Popondetta—29 7175 ● Provincial Agencies Kavieng—94 2131 ● Tora Motors Wapenamanda—57 4059 ● Milne Bay  
Enterprises Alotau—61 1167 ● Al's Auto Repairs Goroka—72 1848



## Bai mi mekim wanem LAIP long winim meri?



### LAIN

#### DIA LAIPLAIN,

*Mi yangpela man i gat 24 krismas nau. Mi pinisim las yia bilong stadi long wanpela koles. Na mi laik marit.*

*Mi no gat wanpela gelpren. Mi bin traim painim meri mi gat laik long en. Tasol mi no gat kain strongpela tingting na pasin bilong raun wantaim ol meri na winim laik bilong wanpela meri.*

*Inap yupela i soim mi long kain rot bilong winim laik bilong meri o olsem wanem?*

#### DIA PREN,

Em i no gutpela tingting long pusim yu

Sapos yu gat wanpela hevi, raitim pas long Laipain, P.O. Box 6047, Boroko, o ringim telepon namba 25 7711. Bai mipela i ken salim bekim i go stret long yu, sapos yu pringim gut nem na adres bilong yu. Mipela i tok klia long ol kain hevi long dispela pepa. Tasol mipela i no tokaut long nem na adres bilong meri husat i raitim pas.

yet long marit kwiktai tumas. Yu yet i pilim olsem taim i sot. Tasol marit em i wanpela rot bilong pas gut wantaim meri bilong yu i go inap long taim yu dai. Olsem na yu yet i mas klia gut olsem dispela meri yu laik maritim i mas i gat olgeta samting i sut stret long laik bilong yu.

Yu mas save gut long olgeta kain pasin bilong meri. Na yu mas larim meri i save gut long yu na tingting gut long marit bilong yutupela.

I gat planti gutpela rot long yu bungim meri. I gat kain bung olsem yut felosip we yu ken painim wanpela meri yu gat laik long en. Yu mas traim long daunim pasin bilong sem. Yu mas save olsem ol meri i gat wankain tingting olsem ol man tu. Na ol i save sem long bungim o prenim ol man tu.

Sapos yu joinim wanpela grup bilong yangpela manmeri long spot pilai o sampela kain bung, bai yu gat sans long bungim sampela meri.

Dispela rot i gutpela moa i winim pasin bilong traim na painim wanpela meri tasol.

Long narapela rot ol papamama bilong yu i ken traim long painim wanpela meri bilong yu.

Sapos nogat, papamama i ken tokaut long sampela yangpela meri. Na yu yet i ken bungim ol dispela meri na raun wantaim ol.

Em bai yu ken painimaut gut long wanpela meri i sut stret long laik bilong yu.

#### MI LAIPLAIN.

# Namba 8 WNB i kamap pater

GUTPELA Papa bilong yumi antap long heven i singautim pinis wanpela yangpela man bilong Bali Ailan long Wes Nu Briten long holim strong wok lotu bilong em hia long graun.

Moa long 6,000 ol pipel i bin kamap long lukim na witnesim odinesen bilong Pater Cornad Kavui long Makiri Katolik Sios, Bali Ailan long namba 15 de long mun Desemba. Asbisop Albert Bundrovout bilong Rabaul Asdaiosis i bin odeinim em. Dispela i bringim namba bilong ol WNB man i kamap Pater bilong Lotu Katolik olsem 8-pela olgeta.

Pater Conrad Kavui i bilong ples Manopo insait yet long Bali. Em i wanpela twin na i kamap long famili i gat 3-pela brata na 2-pela susa. Pater Kavui i bin statim skul bilong em long Penope Komyuniti skul long Bali long yia 1966.

Long 1972 em i go long St. Mary's Haiskul long Vuvu Rabaul, bihain em i go long Channel Koles Ulapia na long 1978 em i joinim Novisiet long Vunapau.

Long 1979 Pater Kavui i stat mekim stadi bilong em long Bomana Seminar Koles i kam inap long 1985. Em i kam aut long mekim prektikal bilong em long mun Me long las yia i kam inap long Desemba namba 15 de ol i odeinim em i kamap wanpela Pater bilong Kor Takondo bilong Jisas o yumi save kolim long MSC.

Ol pipel bilong Bali i soim bikpela amamas tru bilong ol wantaim wanpela bikpela kaikai ol i mekim long onarim nupela na yangpela Pater bilong ol. Moa long 240 pik ol i bin kilim long Tunde namba 17 de long taim Pater Kavui i mekim namba wan lotu bilong em wantaim ol

pipel long ples bilong em yet long Manopo. Ol pipel i redim tu ol gutpela kwaia na ol kain kain samsam bilong ol tumbuna bilong mekim de bilong odinesen i kamap amamas na i gutpela moa.

Bihain long odinesen, Asbishop Bundervout i tokim *Wantok ripota* olsem Pater Conrad Kavui bai wok anitim pastaim long wanpela olpela Pater inap long 2-pela yia orait em inap nau long lukautim wanpela Katolik Misin em yet.

Bishop Bundervout i tok dispela i wanpela pasin bilong Lotu Katolik i save mekim long ol nupela pater em ol i kisim strong bilong Ordo.

Ol i bilip olsem Pater Kavui bai go yet long Kilenge Katolik Misin long mekim nambawan wok misineri bilong em. Kilenge Misin i stap insait long Glosta distrik long WNB yet.



● Pater Kavui wantaim mama na papa bilong em.

## Sande lotu

Frank Mihalic

### Poinim arapela manmeri

SANDE LOTU - 19 JANUERI 1986

Long wanpela liklik taun i gat wanpela meri mauswara i save raun na autim ol rong bilong ol arapela pipel. Em i lukim wanpela samting, na kwiktai maus bilong em i wok.

Wanpela apinun wanpela bisnisman i larim ka bilong em i stap klostu long haus dring. Long moningtaim em i stap yet. Wantu meri mauswara i kirap stori i tok: bisnisman ya i spak olgeta na i no inap draivim ka, olsem na em i larim i stap. Na man ya i no bin go insait long haus dring olgeta.

Stori ya i kamap long yau bilong bisnisman na em i wokim wanpela trik bilong skulim dispela mauswara meri na semim em tru. Long apinun dispela bisnisman i larim ka bilong em i stap klostu long haus bilong dispela meri. Long moningtaim ka i stap yet. Nau olgeta manmeri i ken ting em i bin slip wantaim dispela meri. Nau em i no gat tok moa. Em i kisim save pinis na i pasim maus.

Em i pasin bilong yumi long poinim kwiktai arapela manmeri, putim hevi long ol, skelim pasin bilong ol. Yumi no jas tru, long wanem, yumi no laik harim narapela sait bilong stori, olsem ol jas long kot i save mekim. Nogat. Yumi givim wanpela sait tasol; na planti taim dispela sait i rong - olsem long stori antap.

Harim! Sapos wanpela man i pundaun long rot, dispela i no min em i spak. Ating emi airaun tasol na i gat sik. Nogut yu demim raskol i stilim kaikai. Sapos yu hangre inap long tripela de stret, bai yu mekim wanem? Sapos yangpela meri i gat bel, ating em i no laik bilong em. Tenpela man wantaim i bagarapim em. Sapos trak i sanap i stap na narapela ka i spit i kam na bamim trak, trak i no gat rong. Bikos wanpela meri in o kam long lotu, yu no ken tok em i lesmeri haiden tasol. Nogat. Em i mas lukautim liklik bebi.

Bipo yumi poinim narapela man o meri, yumi ken kisim wanpela gutpela skul long han

bilong yumi yet. Yu taitim han bilong yu nau bilong poinim narapela man o meri. Makim em tru long pinga. Orait, nau yu lukim gut dispela han bilong yu. Bai yu painim olsem: wanpela pinga i poinim narapela man o meri. Yes, em i tru. Tasol lukim gen: tripela arapela pinga i tanim bek long yu. Em nau! Atung dispela i laik putim tripela taim hevi long yu. Ating yu moa nogut olsem man/meri yu poinim

Em i pasin bilong yumi. Yumi olsem draiva bilong PMV. Long nait em i no lukim strongpela lait bilong ka bilong em, tasol em i komplem long lait bilong narapela ka i mekim em i aipas. Jisas yet i tok long Matyu 7, 3 - 5) "Yu no ken wari long rausim liklik hap pipia long ai bilong brata. Mobeta yu rausim pastaim bikpela hap diwai long ai bilong yu yet."

Maski long painim ol rong na asua tasol bilong ol arapela manmeri. Watpo yumi no traim painim ol gutpela samting ol i mekim tu? Tasol, sore, ai bilong yumi i no save lukim kwiktai. Doti samting i sutim ai; klinpela samting i no sutim ai. Yu yet yu traim dispela eksampel. Kisim wanpela bikpela hap waitpela pepa na namel long en yu droim wanpela blakpela namba 2. Orait, nau yu litmapim pepa antap na askim ol man nabaut, ol i lukim wanem samting. Klostu olgeta i lukim namba 2. Tasol ol i no lukim bikpela hap waitpela pepa nabaut long em.

Olsem tasol yumi save lukim smolpela doti samting na yumi no lukim bikpela klinpela gutpela samting.

Jisas i tok olsem long Matyu 7, 1: "Yupela i no ken kotim ol arapela man. Nogut God i kotim yupela tu. Long kain kot yupela i kotim ol arapela man, bai God i kotim yupela tu."

Ritim tru stori bilong John 8: 1 - 11. Olgeta skul i stap insait long en.

## Hagen



## Park Motel

I gat 30 Rum Long Maun Hagen

- Em i no stap longwe long ol stua
- I gat maket i stap klostu
- I gat ples pilai i stap klostu
- I gat satelait televisen
- I gat pikap ka i sambai long ples balus

**Yu Ken Aplai Long Kisim  
Spesel Pe Bilong Yusim  
Motel.**


**MOUNT HAGEN 52 1388**

CABLES HAPARK  
P.O. BOX 81, MT. HAGEN  
TELEX: 52056 HGPNARK



# Painim tewel

• Yu i n a p painim tewel bilong Ned o nogat?



• Putim dispela mak X long ansa.

## Ansa bilong las wik

Lep i go long rait

Antap i go daun

1. Soop 6. Katapul 10. Mi 11. Tudak 13. Manki 15. Oi 16. Kasang 18. Musmus 19. Aua 20. Adres 22. Kaikai 26. Oro 27. Yumi 28. Na 29. So 31. No 32. Angelo 33. Rula.

1. Si 2. Ok 3. Pas 4. Saman 5. Lu 7. Pinga 8. Duim 9. Saksak 11. To 12. Kamda 13. Mase 14. Igam 17. Surik 21. Sayor 22. Kona 23. Aran 24. Io 25. Smel 29. Se 30. Ol.

# Olsem wanem ston akis i kamap



BIPO, TRU long taim i no gat ston akis bilong Hailans i kamap yet i bin gat wanpela lapun man na meri i stap long ples Kunjin.

Nem bilong lapun man em Timbe na lapun meri nem bilong em Doimbe.

Wanpela de tupela i go wok i stap long gaden. Long taim tupela i wok gaden i stap lapun meri ya i tokim man bilong em olsem bai em i go painim kru mambu na bungim ol liklik paia-wut bilong karim i go long ples. Em i tok save pinis long man bilong em na em i kirap i go.

Lapun meri i bungim ol kru mambu putim ol i stap long wanpela hip. Bihain em i go painim na bungim ol paia-wut. Na lapun man Timbe i katim ol suga na pitpit na em i wok long pasim i stap.

Lapun meri i go long pulmapim ol kru mambu i no insait long bilum na em i lukim wanpela ston i stap long graun.

Het bilong ston tasol i stap ples klia. Lapun meri i lukim ston i

narakain tru. Em i no save lukim lain ston olsem bipo. Kwiktaim em i singautim man bilong em i go long lukim.

Man bilong em Timbe i go long hap we ston i stap na em tu i lukim na em i kirap nogut. Na em i tokim meri bilong em. "Ating dispela i mas masalai ston o wanem kain samting.

Timbe i kisim hap diwai na i stat long digim graun arere long ston. Het bilong ston i olsem wanpela akis

Timbe na meri bilong em i digim graun i go daun na ol i painim dispela narakain ston tru i stap insait long hul. Tupela i kamautim dispela ston na ol i sindaun toktok i stap. Ol i traim long tingting long wanem kain samting tru ol inap long mekim wantaim dispela ston.

Long apinun nau tupela i lusim dispela gaden bilong ol na ol i go bek long ples. Ol i karim dispela ston tu i



go na putim i stap long haus bilong ol. Orait long nait bihain long taim ol i kuk na kaikai pinis tupela i singautim ol lain bilong ol i kam na soim dispela narakain ston long ol.

Bihain long ol lain bilong ol i kam na lukim dispela ston ol i toktok long wokim wanpela haus long dispela ples we ol i painim ston ya. Ol i laik slip long dispela hap na bai ol i kamautim moa kain ston olsem lapun meri ya i bin painim.

Long taim ol lina ya i wokim haus pinis, ol i wokim pati long kama-pim moa ston gen.

Olgeta man i bung wantaim na ol i givim nem long dispela ston, na wanem wok bilong dispela spesel ston em ol i painim long dispela hap. Ol i givim nem bilong dispela ples we ston ya i kamap long en. Na long tok ples Nii, nem bilong dispela ston em 'Tui Kunjin' na as bilong dispela tok em ston akis.

Ol man bilong ol arapela ples i harim stori bilong dispela ston akis na ol tu i laikim dispela ston. Ol i harim olsem na ol i salim ol meri i kam long marit long dispela ples we ol lain bilong

katim dispela ston i stap. Orait ol meri i marit nating na ino gat bikpela pe bikos ol pipel long ol arapela ples i laik kisim dispela ston akis.

Em nau dispela ston akis bilong ol pipel long hap bilong Kunjin i go long olgeta hap insait long Westen Hailans. Na nau ol arapela ples nabaut tu long Hailans i save yusim dispela ston long katim diwai o mekim ol arapela bikpela wok bilong ol.

Simon Yesim,  
World Vision,  
P.O. Box 409, Hagen.

## Wantok BUK KLAP

LUKIM WANEM BUK YU LAIKIM NA SALIM TASOL MANI I KAM NA BAI MIPELA I SALIM BUK BILONG YU I KAM.

- Putim dispela mak x insait long boks long makim wanem buk yu laikim.
- Prais bilong buk i karamapim pe bilong pos opis insait long PNG.
- Bai i gat ol nupela buk bilong Wantok Buk Klap olgeta tupela wik.



• A Martyr For The Truth  
by Jerzy Popietusko  
18 X 25 CM



• Racing Motor Cycles  
by Luigi Rivola  
13H X 19H CM

Racing Motorcycles



• Using The BBC Micro in Edukesen  
by Don Thrope  
15 X 21 CM



• Finding out about Rocket and Spaceflight  
by Usborne Books  
19H X 20H CM



Salim dispela fom wantaim sek o posta oda bilong yu i kam long: Wantok Buk Klap, P.O. Box 1385, Port Moresby.

NEM: \_\_\_\_\_


ADRES: \_\_\_\_\_

- Salim oda bilong yu i kam.
- Ol buk bai kamap bihain long 28 de.
- Olgeta buk ya i kam long WEB Books.
- Putim oda bilong yu long dispela fom tasol.

## SKRUIIM TOK

Lep i go long rait

1. Rabaul i stap long dispela Nu Briten
3. Namba tu Praim Minista
7. Sip bilong pait
8. Diwai olsem karuka
10. Yu ..... we?
11. Leprosi
15. Mi hangre mi laik kaikai .....
16. .... Lei (singsing bilong Fiji)
20. Hul bilong bel
21. Enimal i save mekim wankain singaut olsem nem bilong em
22. Papua ..gini
23. Kalambu
27. Wan, tu, .....
28. Em i tok .....
30. Mekim save
32. Biktaun long Morobe Provins
34. Wanpela meri, raitim ... long mi
35. Bilong ol masta na misis em wait
36. Marasin bilong bel i pen



- Foren Afeas
7. Wanpela binatang i save dringim blut
  9. .... gat wok
  12. Yes (Tok Motu)
  13. I no yu
  14. Wankain liklik olsem kurita
  17. Taim yu go, bai yu

- tok olsem
18. Klok i save toksave long en
  19. Minista bilong Transpot
  21. Kaunim buk
  24. Blasius To....
  25. Sapos yu katim dispela sayor, bai

- aiwara i kapsait
26. Pikinini Sepik
  29. Nambis bilong Mosbi
  30. VD, sotwin na malaria em tripela
  31. Givim siksti
  33. Ples bilong kisim sut

Antap i go daun

1. Yau
2. Pilai bilong et bal
4. Andrew Yaueb i bosim nau
5. Adam .... Iva
6. Minista bilong



## Peka i gat 3-pela wik moa long haus sik

BIKNEM MID-FILDA bilong PNG soka, Ludwig Peka bai lusim Royal Brisbane Hospital long tripela wik bihain. Ol dokta long dispela haus sik insait long Australia bai larim Peka i go ausait, sapos em i ken wokabaut i go i kam

long strong bilong em yet. Long tripela wik bipo, Peka i kirap lusim bet na wokabaut i go i kam long eria bilong haus sik. I no gat wanpela dokta na nes i helpim em long wokabaut. Na ol dokta husat i save lukautim em i amamas tru. Long

wanem ol i sori long lukim Peka i slip tasol long bet long 12-pela wik olgeta namel long 24 Septemba i kam inap 18 Desemba, las yia.

Pablik rilesen opisa long Royal Brisbane Hospital, Mista Ken Buckley i tok klia long tupela wik bipo olsem Peka i wok long kamap orait. Long dispela taim em i lukim Peka i kirap na wokabaut raun isi isi. Na em i tok ol dokta i bilip bai dispela strong bilong Peka i helpim long kamap orait tru long liklik taim bihain. Tasol ol dokta bai lukautim Peka yet insait long haus sik i go inap long taim em inap tru long lusim haus sik.

Ludwig Peka i kisim balus long Mosbi na go daun long Royal Brisbane Hospital long Fonde, 24 Septemba,

las yia. Em i bin kisim bikpela bagarap long bel bilong em bihain long em i bam wantaim PNG golkipa, Adam Wangu insait long intenesenel soka resis wantaim Saina soka tim long Lae. Dispela soka resis i kamap long Lae long Independens De, Mande 16 Septemba.

Dispela bagarap i mekim blut i ran na pas long kidni bilong Peka. Em i bin slip long Angau Jeneral Hospital long Lae namel long 16 Septemba i go inap long 20 Septemba. Na bihain Papua Niugini Futbol (Soka) Futbol Asosiesen (PNGFA) i givim han long salim em i go long Pot Mosbi Jeneral Hospital. Tasol ol dokta long Mosbi Hospital i bilip Peka i mas go long haus sik long Australia long kisim gutpela marasin

na smatpela lukaut sevis bilong ol dokta.

Namel long taim em i stap long Royal Brisbane Hospital i kam inap nau, ol dokta bilong katim bodi i katim bel bilong Peka tripela taim pinis. Ol i glasim na rausim blut nogut i pas long kidni bilong em. Na ol i rausim wanpela kidni na wanpela splin bilong em.

Jeneral Seketeri bilong PNGFA, Andrew Waho i tok klia olsem olpela nesanel soka kosa bilong PNG, Ralph Suchanek i lukautim peka long haus sik. Suchanek wantaim famili bilong em i lukautim Peka long kaikai, bilas na ol arapela samting em i gat laik long en.


Suchanek wantaim famili bilong em i stap long fam bilong ol yet. Dispela fam i stap 10

kilomita longwe long Brisbane Royal Hospital. Sapos Peka i lusim haus sik, em bai gostap wantaim Suchanek famili inap long tupela wik pastaim na bihain bai em i kam bek long Mosbi na i go joinim lain wanpisin bilong em long Lae.

Bihain long taim Peka i bin kisim bagarap long Lae, ol hetman bilong PNGFA i kirapim Ludwig Peka Tras Fan. Ol i salim askim i go long olgeta provin-sal soka asosiesen, ol bisnis haus, ol arapela spot asosiesen na

manmeri long helpim Peka wantaim sampela "kina na toea." Dispela mani i bilong baim haus sik, kaikai na stretim rot bilong Peka long balus.

Waho i tokaut long tupela wik bipo olsem mani insait long dispela tras fan i bungim K1,000. Tasol mak bilong mani long baim haus sik long Brisbane i antap moa i winim dispela K1,000 mak. Na Waho yet i salim tok save pepa i go aut pinis long ol spot asosiesen insait long PNG long givim han na salim moa mani long helpim Peka.



● Ludwig Peka — em i gat 3-pela wik moa long haus sik.

## Sofbal Federesen i tambuim 5-pela asosiesen long sempiansip

OL SEMPIAN pilaia bilong 5-pela sofbal asosiesen aninit long Papua Niugini Sofbal Federesen bai no inap pilai long Nenesenel sempiansip resis long Lae namel long Ista holide wiken.

Dispela 5-pela asosiesen em Mosbi, Rabaul na Madang Man Sofbal Asosiesen wantaim Man na Womens asosiesen bilong

Manus na Kimbe. Ol i no baim ful afiliesen fi bilong dispela sisen i go long Federesen. Olsem na Federesen i tambu long dispela lain asosiesen long salim tim o pilaia i go long nesenel sempiansip resis na arapela intenesenel sofbal pilai long

dispela yia. Dispela tok orait bilong rausim dispela 5-pela asosiesen i kamap long wanpela spesel kibung bilong federesen namel long Nu Yia. I gat strong-pela tok i kamap olsem federesen i askim olgeta asosiesen long

pinisim dispela fi long Sande, 1 Desemba, las yia. Ol arapela asosiesen insait long PNG i karamapim dispela fi pastaim long dispela "lasde". Tasol dispela 5-pela asosiesen i popaia.

Presiden bilong federesen, Jack Pidik i

tok ol liklik senta olsem Alotau, Tabubil, Mendi, Wewak na Vanimo i harim tok na pinisim fi bilong ol. Sapos ol dispela liklik senta i ken mekim dispela samting, i nogat wanpela gutpela as tru long bikpela senta olsem Rabaul na Mosbi long popaia.

Pidik i tok ol dispela bikpela sofbal senta i mas go pas long soim gutpela rot. Dispela fi bilong sisen i no bikpela hevi. Em i K20 tasol long wan wan klap insait long wan wan asosiesen. Na ol asosiesen husat i pinisim dispela fi, em Womens Sofbal Asosiesen bilong Mosbi, Rabaul na Madang. Ol Man na Womens asosiesen bilong Alotau, Popondetta, Lae, Mendi, Maun Hagen, Goroka, Wewak, Vanimo, Tabubil, Kavieng na Arawa i pinisim fi bilong ol tu.

Em i tok klia olsem ol pilaia bilong dispela 5-pela asosiesen bai popaia long tripela bikpela samting. Em nesenel sempiansip resis insait long Lae long Ista (28-31 Mas), intenesenel sofbal pilai namel long dispela yia na ol sofbal kos i kamap aninit long lukaut bilong Federesen.



● Sampela gutpela pilaia bilong Mosbi bai i no inap soim stail bilong ol long sofbal sempiansip

### SOFBAL DRO - MEN

#### WIK 12 — SANDE 1 JANUERI, 1986

##### DIAMOND 1

Taim	Tim	Reperi
9.00	Bomana V SPIA	Tamti
10.30	NGI V Fuji	A.Girana
12.00	Mazda V Kabi	L.Iara
1.30	Nissan V B.Eagles	R.Ratia
3.00	Elcom V I.Hawks	M.Pasok
4.30	Malangan V Yokomo	W.Daniel M.Tako

##### DIAMOND 3

9.00	A.Niugini V Chebu	D.Tamia
10.30	ESA V Mazda 2	B.Loahin
12.00	Elcom V YMCA	T.Pelis
1.30	NGI V Kabi	N.Simba
3.00	Malangan V B.Eagles	S.P'raket
4.30	Nissan V Chebu	I.Tovia

##### DIAMOND 2

9.00	Insurens V YMCA	L.Sorang
10.30	Tarangau V Adcol	J.Hasun
12.00	Nissan V Hanzabe	T.Tulem
1.30	Aviat V Fuji	R.Misiel
3.00	Yokomo V Karanas	D.Daniel
4.30	Kabi V ESA	E.Koniel

##### DIAMOND 4





9.00	Karanas V Manalos	L.Maing
10.30	Yokomo V Dela Sale	I.Betson
12.00	Aviat V Malangan	A.Uari
1.30	Tarangau V Saints	L.Kaminiel
3.00	Insurens V Manolos	L.Bola
4.30	B.Eagle V Yuni	N.Wulia

Club:

Time - Steward - Umpire  
 9.00 - - Tarangau  
 10.30 - M.Solo - Chebu  
 12.00 - F.Miso - ESA  
 13.30 - W.Daniel - Elcom  
 15.00 - - Aviat  
 16.30 - M.Kalas - Mazda



# OL PAPA BILONG KAMPANI\*



**I amamas tru  
long kamap**

**pablisa bilong dispela tupela  
namba wan niuspepa bilong  
PNG stret.**

# TIMES

of Papua New Guinea

# Wantok

\* **Word Pablising Kampani i gat 4-pela bikpela  
Sios insait long Papua Niugini i papa long en:  
Katolik (750,000 memba) Luteran (550,000  
memba) Yunaitet (300,000 memba) na  
Anglikan (220,000 memba).**

**NA SAMTING OLSEM 6-PELA MANMERI NAMEL LONG  
10-PELA PIPEL LONG OLGETA HAP BILONG PAPUA  
NIUGINI IGAT NEM LONG DISPELA KAMPANI.**



# PNG meri i redi nau long Oseania soka resis

PAPUA NIUGINI bai salim wanpela soka tim bilong meri i go long Oseania Womens Futbol Kap semianpsip resis long Oklan, Nu Silan namel long 29 Mas i go inap 12

Ben Wauns i raitim

Epril long dispela yia.

I gat 36 meri pilaia bilong PNG trening skwat i gohet long trening strong nau. Nesenel seleksen komiti aninit long

PNG Futbol (soka) Asosesen (PNGFA) i makim dispela lain meri bihain long nesenel wimen soka taitel resis insait long Lae long Oktoba las yia.

Jenerel Seketeri bilong PNGFA, Andrew Waho i tok olsem Nesenel seleksen komiti bai makim 18 meri pilaia tasol long fainal PNG tim. Bai oli makim 7-pela ofisal long go wantaim dispela soka tim long Nu Silan. Olsem na ol

pilaia insait long trening skwat i mas smat long trening, sapos ol i laik go resis. Waho i tokaut tu olsem wan wan meri pilaia insait long PNG tim i mas givim K500 long PNGFA. Dispela mani bai karamapim kos bilong baim balus i go long resis na kam bek. Tasol PNGFA i sanap makim dispela tim na askim ol bisnis haus, wan wan soka asosiesen na ol manmeri bilong PNG long givim helpim mani long salim tim.

Em i tok, "Nau em i namba wan taim tru long PNG soka tim bilong meri i go resis long ovasis. Ol dispela meri bai soimaut olsem ol PNG meri i ken kik egensim soka tim bilong arapela Oseania kantri. Maski PNG i lus, tasol em i gutpela pasin long larim ol meri i kisim ekspirens na lainim ol nupela rot bilong kirapim smatpela soka pilai.

"Dispela namba wan taim i no mekim ol meri i pret na luk daun. Long wanem ol meri pilaia bilong yumi (PNG) i ken winim

planti resis, sapos ol i yusim stail bilong givim siksti na kik strong. Bai ol meri PNG i sot long ekspirens long kik egensim tim bilong Australia, Nu Silan, Saina, Sainis Taipei, Fiji, Solomon Ailan na Westen Samoa. Tasol em i orait. PNG bai trai hat long daunim ol dispela birua, sapos ol meri i bihainim gut toktok bilong kosa na bungim tingting long pilai gut."

Hia em i nem bilong 32 pilaia insait long trening skwat:- Ibo-wato Palo, Rose Bukoya, Jean Norrie, Jennifer Totabu, Pensy Sawan, Julie Bibi, Velda Mave, Docas Horris, Wadobato Bani, Elvina Joseph, Joycelyn Siniuh, Kumaut Molean (MOSBI); Lydia Samson, Dorothy Lucas, Singeng Bosuke, Margaret Anio, Nellie Popau, Joanne Apiro, Ursula Wanana (LAE); Angela Gari, Rosemary Dala, Mary Gar, Mary Topu (KIMBE); Ikanau Matangiau, Anne Bonney, Margaret

Chalapan (GOR-OKA); Sussie Robert, Jennie Stevens, Rolin Noen (RABAU); Helen Mapun, Dorothy Koybu (HAGEN), na Hagar Barau (POPONDETTA).

Ol pilaia insait long fainal tim bai kam bung long trening kem insait long Mosbi namel long 17 Februari i go inap long 26 Mas. Na bai oli lusim Mosbi long 27 o 28 Mas.

Ol pilaia husat i no go insait long fainal tim bai kisim bek K500 bilong ol. Planti pilaia i i givim dispela man bilong ol i go long PNGFA pinis na i wok long trening na sambai. Tasol ol i laikim ol kampani, bisnis haus, soka asosiesen, wan-pisin na soka sapota insait long PNG igivim helpim mani. Bikos PNGFA i mas bungim moa long K25,000 long lukautim wokabaut bilong dispela tim i go pilai long Nu Silan na kam bek.

Waho i malolo yet. Na em i hat long kisim tok klia long mak bilong helpim mani em PNGFA i bungim pinis.



• Wadobato Bani (namel) i stap long trening skwat bilong ol meri PNG.

**TALK TO  
THE PEOPLE  
OF PNG IN THEIR  
OWN WAY TALK IN**

**Wantok**

**THE WORLD'S ONLY PIDGIN  
NEWSPAPER**







**ANTIPOLO RIZAL - MANILA:** — Oposisen kendidet bilong ileksen bilong maim nupela presiden bilong Filipins, Misis Corazon Aquino na Salvador Laurel i stap insait long wanpela bikpela bung long kempen bilong ol. Ol tupela i wok long kempen nau long hap long Luson Ailan. Dispela foto i soim Laurel na Aquino long taun bilong Antipolo.



**OLONGAPO - FILIPINS:** — Presiden Ferdinand Marcos bilong Filipins i toktok long planti tausen-sapota bilong em long taim em i wok long kempen i stap long Olongapo siti. Em i tok olsem bai em i larim ol lain bilong Amerika nevi i stap yet insait long Filipins. Presiden Marcos i bin toktok long ol pipel klostu tasol long bikpela nevi bes bilong 7th Flit bilong nevi bilong Amerika.



**ROM - ITALI:** — Ol plisman i karim ol sabmasin gan i was i stap long intenesenel ples balus bilong Rom. Ol i mekim olsem bihain long sampela lain bilong Arab i bin tromoi bom long opis bilong El Al em balus bilong Israel na kilim 15 pipel olgeta. Dispela bikpela birua i bin kamap long 27 Desemba. I bin i gat 30 arapela pipel husat i bin kisim bagarap. Ol pasindia ya i laik kisim balus i go long Israel long taim dispela birua i bin kamap.



**ROM - ITALI:** — Dispela pasindia i bin dai bihain long ol lain Arab i bin tromoi bom insait long Leonardo da Vinci ples balus long Rom. Ol 15 pipel olgeta i bin dai long dispela birua.




**BOGOTA - KOLOMBIA:** — Ol lain fama i painim bodi bilong wanpela paitman em ol i painim long saut wes maunten long Kolombia. Ol i bin painim 80 bodi olgeta bilong ol dispela paitman long ol matmat i stat nabaut long ol dispela hap.



**BERUT - LEBANON:** — Ol lain soldia bilong Lebanon i sindaun isi na pilai kas i stap long boda bilong Berut. I no bin gat pait i kamap long dispela hap bihain long ol lain Kristen na Mustim i bin sainim tok orait long stapim pait.

# CO-AIR

Co-ordinated Air Services Pty. Ltd.



**OWNED BY  
PAPUA NEW GUINEANS  
WORKING FOR  
PAPUA NEW GUINEANS**

## DAILY FLIGHTS FROM LAE TO

MONDAY	TUESDAY	WEDNESDAY	THURSDAY	FRIDAY	SATURDAY
MENYAMYA ASEKI ASARU IMINE ENGATI	FINSCHHAFEN SIASSI LABLAB	MENYAMYA ASEKI ASARU IMINE ENGATI	FINSCHHAFEN LABLAB SIASSI	TABUBIL KIUNGA MENYAMYA	FINSCHHAFEN LABLAB SIASSI MENYAMYA ASEKI

SCHEDULED SERVICE

## AVAILABLE FOR CHARTER THROUGHOUT PNG

**CONTACTS:**  
LAE — 42 3783, 42 3707, 42 3080.  
A/H MANAGER J. WIELENS 42 3158.  
CHIEF PILOT PAUL CURRY 42 3828  
OPERATION KEITH THOMAS — 42 1907  
WAU — 44 6241  
FINSCHHAFEN — 44 7019, 44 7049



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.